

Bintu Bitanu na kimo Bya Lupepu

Lwakwa Ngabaliela Kwi Danyela

 Bino na kumya bingi pa ba...baana betu babacheche lukeelo luno, bacheche, mwayukatu, bacheche “fefe” ne “fifi,” bicheche, aye, mwayukatu, ba ma sikisitiini. Kabiji beya mu kipwilo, mwayukatu, pepi nobe...Bansongwakazhi babacheche, pepi nobe yoya myaka, bakeba kumweka bingi bulongo, mwayukatu. Abo, mwayukatu, suki yonse izhinga, peulu ya mitwe wabo; Na kwibamona, byo Najikusapwilanga, itwajijilatu na kupona, na kupona. Kabiji, pakupitapo kimye kicheche, batatula kwiyibwezha kunyuma na kufuma mu bilungi byabo, izhinga yalepa.

² Nsongwakazhi wa mucheche wa kwa nyenga Downing, kabiji—kabiji Naji kumumona. Kabiji mucheche—mucheche—mucheche...Mulongo Collins mucheche wanji...Jizhina janji ng’anyi? Mucheche...[Mulongo umo waamba mba, “Betty.”—Waku.] Betty, Betty mucheche. Najikuseka pacheche, amiwa mwine. Bino Najikumona bonse balamba, mwayukatu, bonse benengezha bulongo, kabiji kyajinga kyatala pa...

³ Kyawama, michima yenu ipeshiwe, mutemwe, obewa walamba, kwi amiwa, nangwa byonkabyo. Abyo ibyo. *Kulamba*, ke, mupashi walamba ke yewa wakonsha kwiya na kwikala mumbung’eno nobe byobya, kabiji ne kuteleka ku Mamboawama. Akyo kyo kilengela nsongwakazhi kwikala walamba. Kabiji Nalanguluka mba yense nsongwalume wakine, ao wafikilamo kusongola, ulangulukatu kintu kimo. [Mulongo Neville waamba mba, “Amena.”—Waku.] Nakusachila, mwane. Akyo kyawama. Muntu umo waswishang’ana ne amiwa. Abyo, abylo ibyo. Kijitu bulongo. Naketekela mba abo bo Bukine.

⁴ Bushe kikye kechi kyenyi nenyi? Napitailatu nazhikula monka mu Danyela 9 byo Najikushikula Baibolo wami. Bino, Amiwa kimye kyonse mbula bantu bonse, mba kechi bafwainwa kuvuula kochi wabo ne, aba baji na jilaya jasabika, nanchi Naketekela mba njami kechi byojiji ne. Bino—bino Namona bimye bimo byo Mbula kumuvuula, kasa nji na jilaya jasabika, kine ja esakanatu. Kabiji Naketekela mba aje kechi jiji nakyo ne.

⁵ Pano, oo, amiwa mwine, atweba...kabiji Naketekela pa jibumba, twasachila Kyeenyi kya Mupashi Wazhila lukeelo luno.

Kabiji twasachila lumvwang’ano lwa bupopweshi kabiji ne kutanwapo kwa umo ne mukwabo. “Ke kintu kyawama bingi, ke kintu kyawaina, kyawamisha bingi, pa kutanwa pamo kwa balongo mu kukwatakana. Kijitu pamo nobe kuwama kwa

kushingwa kwa manyi kupompolokela pa myevu yakwa Alona, kufikatu ne ku mufuko wa siketi wanji.”

⁶ Naji kuya na kuja leelo, akwa ku Blue Boar, kabiji ng’anyi ye Najikutana kokwa Mulongo Bill kuno, kabiji ne Nyenga Dauch waikala popa, kasa—kasa babena kuja umo ubena kumweka-bulongo ku meso, nzolo wakusalula ye Nakibula kumonapo kala, kabiji badingatu na kimye kyawama, kasa basulwila, mwayukatu. Naya pa nzubo ya peulu na kakumanya kibese kikatampe kya kipwilo, kabiji kebakebe kundipilila kajo kami ka mulajilo. Pano, akya kyajinga kyawama bingi, Nasata pa kyokyo.

⁷ Byo nafikile ku nzubo, Billy waiya na kibokoshi kya tomato akyo kyandetejile muntu umo, kufuma kokwa kwalepa kwawama, ku kibuji kyatala kya ku Georgia kokwa, akwa kwatalala, byo bambula, nobe kyonka kino kimye.

⁸ Nanchi, nakumenye mulunda mucheche pangye. Nafuminenga ku misambo ya mepuzho ne mikumbu, mute ano, kabiji najikwiyanga ku kipwilo pepi nobe awala umo na afu wapitapo, kabiji bacheche... nobe mulongo mwanyike, pangye, waambile mba... Naambile mba, “Kwakaba.”

Aye waambile mba, “Kine *byo* kuji!” Nayukile mba wafuma ku Georgia, nanchi waambile mba, “Kine kwakaba ku Georgia!”

⁹ Kyawama, tubena kweseka kufuma pa kifulo kyakabisha, kechi ibyo nenyi? Akyo kyo twaishila muno.

¹⁰ Nemusachila bingi, balunda, pa buwame bwenu bonse. Kika kyo Nakonsha kuuba kwakubula anweba? Pano kika—kika kyo Nakonsha kuuba kwakubula anweba ne? Inge kechi Najinga na muntu watemenwe ne, kwakubula muntu nangwa umo wakutelaka ku Mbila ne, Mbila yami yonse kechi yakonsha kwikalala na buwame ne. Amiwa kechi nakonsha Kwiisapwila ku mashiki a matelefoni ne bichi ne. Abyo kechi byakonsha kwikyumvwa ne. Nanchi kyafwainwa kwikalala bantu nobe anweba, abo bakonsha kwiya na kutelekako. Kabiji inge mwaiya mwaikala pa kifulo kyakaba nobe bibye, kabiji kiji... Mukazhami waji kwamba mba nakuvwanga nobe mbena kupya kunyuma kokwa, lukeelo luno. Kabiji ne pa kumona bantu, kabiji kimye kimo bakolwa, aabo baikala mu mbung’eno iji byonkabya, Lesa emupe ya—yawama, nzubo yawama mu Lukumo, yo milombelo yami. Kabiji Njina luketelelo ne kuketekela mba Aye ukekyuba.

¹¹ Pano, twayai tumone. Kochi wami, muntu umo waji kumufumya papo. Kabiji Nafwainwa kwikalala na kutanga kucheche bufuku buno. Baanga babena kumvwa buwame mu kibese kitanshi kya bibye? [Kipwilo kyaamba mba, “Amena.”—Waku.] Oo, inge kechi kwajinga kyakabisha ne, twakonsha kutwajijilatu kuya kulutwe, mu mulungu yense, na yuwe—

yuwe Buuku wa Lumwekesho. Amiwa Namutemwatu. Amiwa ngikalatu Monka Mwiaye. Kabiji lombai, nobe, yami, uno mulungu, mambo Pamulungu ubena kwiya Amiwa . . . Aye Nkambo inge waswa, Nafwainwa kupwisha kyokyo, kwikajika pamo aya milungu. Kabiji ke kintu kimo kyo Nabula kuyukapo nangwa kimo ne. Kabiji nanchi Amiwa naketekelatu Nkambo namba Aye usa kwikala na mukumbu wami.

¹² Kabiji Ami—Amiwa natanga bantu bavula bapusanapusana abo—abo baambapo pa kikye, banemba pa kikye. Natanga byanembwa kushi kukwe, pe Dr. Scofield, wafunda bingi, bino nangwa byonkabyo kechi naswang’ana naji ne, pa byanji byavula byanembwa kushi, mambo Amiwa kechi mbena kwibimona ne. Kwepi . . . Kyafwainwa ku—kyafwainwa kulenga kipikichala kiji bulongo.

¹³ Bino, inge ubena kubika kyakusokankanya pamo, kabiji kintu kitanshi mwayukatu, anweba mwamba mba, “Oo, akye kyaya peulu *papo*. Ine, Amiwa naketekela mba akye kiya peulu *papo*.” Kyawama, wafwainwa kutala kukwe mo kyalengelwa, pakuuba mba umone kyo ubena kuuba. Kabiji inge obewa—obewa wabula kuba kyokyo, kipikichala kyobe kikekalatu kyalubakana.

¹⁴ Pano ibyepi inge watola . . . wajinga na kipikichala kyabaya, kyawama kya lubaji lwa mpuzha ya mu muzhi, kabiji ne ng’ombe ubena kutola nsono peulu ya kichi? Bino, akyo kechi kyakonsha kwikalatu bulongo ne (kyakonsha nyi?), mambo kechi utola nsono peulu ya kichi ne. Nanchi, abyobyo kiji inge, kwi obewa, Mupashi Wazhila wabula kubika pamo akya Kinembelo. Nanchi, obewa uji na kyonse, kipikichala kikatampe kya bukuzhi. Abyo byo tubena kukeba, Bukine. Kabiji poso twayuka mba Bukine, tukekishatu buke bwakyo. Kabiji pano, inge Lesa witupa Bukine, kyawama, nanchi Amiwa ke kyamba.

¹⁵ Mwayuka kine kintu nyi? Naketekela mba Mulongo Roy Slaughter kabiji—kabiji ne bamo batanshi—kupwila muno, abo batatwile kunyuma kwine kala . . . Kwajinga pepi nobe, Naketekela mba, myaka itanshi isatu nangwa myaka foolo ya ng’ingijilo yami, ponka pano pa tabbanako, Amiwa kechi nakonsheshe kusapwila pa mutwe wa kalunga kabafu ne, mambo Amiwa—Amiwa kechi nayukile ne kana yajinga mpuzha itema mujilo, nangwa kana kyajinga kilende. Kabiji kimye kyonse akya Kyambo po kyaambiwe mba, *kilende*, Naikalanga na kilumbululo, kyaamba mba, “*Kilende*.” *Kilende* ke “kimbo kyakuzhikamo.” Kimye kyonse Kyaambanga pa kalunga ka bafu, “*Kilende*, kimbo kyakuzhikamo.” Kabiji Amiwa ne kilekeletu bunke bwakyo poso byo Nayukile kyo mbena kwambapo, apo ipo po Nasapwijile pa kalunga kabafu, nanchi kimye kyo Natulukile kipikichala kyonse kabiji ne kumona pokyajinga. Mambo, Nayuka mba wa mwingilo ukumbula kwi Lesa, na byobya byo abula akya kipwilo, mambo abo

bakakwachijilatu ku kyonka kya. Kabiji nanchi, pano, ibyepi inge Nebalengela ba kwachijila pa kifulo kyatama, kabiji pano kimye kifika kyakuuba mba akya kyo bakwachijila kechi kikemana ne? Mwamona?

Kabiji mu kyokya kimwesho Nkambo kyo ampele, kimye kimo kunyuma, aa mamilyoni...kimye awa Umo kyo aambilenga kwi amiwa, amba, "Obewa ukapingulwa, patanshitu, na onka Mamboawama o usapwila."

¹⁶ Naambile mba, "Amiwa nsapwila kintu kimo kyonka kyaubilepo Paulo, kabiji ne bonsetu bashala."

¹⁷ Kabiji onse mawi a mamilyoni abijikiletu pamo, "Tubena kukokolokela pa kyokyo." Akyo kyajinga ikyo. Mwamona? Ibyo.

¹⁸ Nanchi Mbena kukeba kutwajijila bufuku buno, bino, nanchi kechi tusakutaya kimye kyabaya ne. Kabiji kechi mulubeko ne...Bino, lukeelo luno...Njina na byanembwa bichehe papo. Lukeelo luno Najikwamba pe Danyela mubuzha, Ngabaliela kwiya kwi aye na kumukambizha pa bintu biji kulutwe. Abyo byo twajinga nabyo lukeelo luno, bya mikambizho ya pa bintu biji kulutwe.

¹⁹ Pano, bufuku buno, tubena kwamba pa *Bintu Bitanu na kimo Bya Lupepu Lwakwa Ngabaliela Kwi Danyela*. Pamulungu Walondelapo, inge Nkambo waswa, kwikajikwa kwa milungu sebete, pa kifulo kyayo, mwaila bimye. Kabiji pepi po twaimana? Pano, inge twakonsha kutana kyokyo kabiji twikikajika bukine, na ngyalutwe, nishi tukayuka awala ye tubena kwikalamo. Bino, atweba kechi tukayuka kimye kyo Akeya ne; kafwako nangwa umo ukayuka kyokyo ne. Yesu kechi wikiyuka ne, Ayemwine. Aye waambile mba Aye kechi wikiyuka ne. Aye waambile mba Bataata, bo bonka, bayuka kyokyo. Kafwako nangwa Bamalaika bayuka kyokyo ne. Kafwako nangwa umo wa mwiatweba wayuka kimye kyo Akeya ne, bino twakonsha kubulang'ana mba akye—akyé kimye...akyé kimye kyo tubena kwikalamo, kuyuka byo twafwenya pepi.

²⁰ Pano, kupitu-lukamotu pacheche, mambo bansongwalume babena kukopa matepu a bibye...Bamashinyi babena kwingila kunyuma mu kibamba. Kabiji ne ma tepu, nangwa byonkabyo, atumwa, konse konse.

²¹ Pano, lufunjisho lwa lukeelo luno, panyuma ya kubwelulukamo mu kyapitala kyabu 4 ne 5, pano twaimena pa...kutatula na kyapitala kyabu 9 kya kwa Danyela. Kabiji pano, bufuku buno, tubena kutwajijila na kyapitala kyabu 9. Kasa tukyangye kufwenya kwipi ne, twayai tukunyike mitwe yetu pa kimye kicheche ne kwamba kwi aye Nsulo ya Kyambo.

²² Lesa wetu wa lusa, kine atweba twayuka mba Anweba mwayuka nkebelo ya muchima wetu. Anweba mwayuka kine kintu kyo twaikela muno. Kabiji Anweba mwayuka mba atweba kechi twaiya bufuku buno na mambotu twalanguluka

mba tutanwe pa mpuzha yawama, ne kukokoloka pacheche mabaanga ano. Taata, Amiwa kechi naketekela mba kuji muntu umo uji muno na mambotu akyokyo kintu ne. Naketekela mba tuji muno bufuku buno mambo twashininwa bingi, bukishika, kabiji tubena kukeba kuyuka ABYO BYOBYAAMBA AYE NKAMBO.

²³ Twimutemwa Anweba, Nkambo, kabiji twatemwa Kyambo Kyenu. Kabiji umvwe aye mpuzha Yo mwitunengenezhezha, mutengetu peulu ya mitwe yetu, kabiji ne ao matafwali a shamende, twasata kwi Anweba pa ino mpuzha. Mambo, twaketekela mba kuji Muzhi kukila jiulu, ako ko twatazha mitwe. Kabiji twalanguluka pa banshakulu bentu abo babujile jije jishuko, kabiji kitulengela kukunyaika michima yetu na buvu, Nkambo, pakuuba mba ke twijizhanye.

²⁴ Pano, Taata, twalomba mba Anweba musakwitushikwila atweba, bufuku buno, Kinembelo. Iyai, mwende netu, ku lubaji lwa umo umo mwi atweba, byo tubena kuya muyuwe mukwakwa bufuku buno. Ambai kwi atweba byonka byo Mwaubile ku boba bayilenga ku Emasa, kufuma ku Yelusalema. Amba, inge mpwijilo yapwa, bufuku buno, twakonsha kuya ku manzubo etu apusanapusana ne kwamba mba, "Bushe michima yetu kechi yajikupyanga mukachi ketu byo twajji kumumvwanga Aye na kwamba kupichila mu Kyambo Kyanji!"

²⁵ Peshai kutanga. Peshai kwingila kwami kwa bumuntu, Nkambo. Shikulai kanwa kami ku kyokya kyakine, kabiji mwikashike ku kyokya kyatama. Kabiji tambulai lukumo kwi Anweba bene, kabiji lukumo lwikale mu bantu Benu, pakuuba mba bakonshe kumona awala ye tubena kwikalamo kabiji ne kufwenya pepi kwa Kwiya kwa Nkambo Yesu. Mambo, twikipuzha mu Janji—Janji Jizhina, Jizhina ja Yesu Kilishitu. Amen.

²⁶ Pano, kubwela panyuma mu Binembelo byetu mu kimye kichechetu, twatana kuubsa mba Danyela wajinga mu buzha pa myaka yalepa sikisite-eiti. Kilangulukaipo! Pano, anweba, ne kipepala kyenu ne pezulu, aba bajikubula kwibitambula lukeelo luno, bakonsha kwibitola bufuku buno. Kufuma ku A.D. 606 kuya ku 538. Fumyai 538 kufuma mu 606, mwatana myaka sikisite-eiti ayo yajinga na Danyela . . . mu buzha; kafwako kipwilo kyakuyako ne, kafwako busapwishi bwa kumvwako ne, kafwako. Bino wajinga na mabuuku amo, imo mivungilo, abyongauzhi wajingako kunyuma yanji byo aawile, kabiji wajinga—wajinga Yelemiya.

²⁷ Pano, kimye kyo afunjilenga Binembelo, wamwene bimye bibena kupwa, amba bimye bya myaka sebete . . . Kabiji Danyela waketekejile kyambo kyonse kyaambile Yelemiya ngauzhi. Kabiji Naamba kikye, ku jibumba jami bufuku buno: Bushe twafwainwa kuketekela bangauzhi betu nyi?

[Kipwilo kyaamba mba, "Amena."—Waku.] Ee, mwane. Mambo, Kyambo kya Nkambo kyaishile ku bangauzhi. Bo baji na ABYO BYOBYAAMBA AYE NKAMBO. Kabiji ngauzhi wakine kechi ukapusanako ku—ku kyambo kya ngauzhi mukwabo ne. Abo kechi Bakekilengela kwamba kintu kyo Kyabula kwamba ne. Abo bakambatu byonka byaambile ngauzhi wakine, akya kibalengela kwikala ngauzhi. Pano inge batambula kyokyo, kabiji babwela baambilá jimo bintu bikeya, byobayuka kikye, na moyo mu muchima wabo, kuchina mba bakamba kintu kingi ne kutwala muntu umo mungi. Atweba kechi tukeba kuba kyokyo ne. Tubena kukeba kwikala kyakine amba tuji na Kyambo kya Nkambo saka tukyangye kwamba mba ABYO BYOBYAAMBA AYE NKAMBO. Mwamona? Kyafwainwa kwikala kya bukine, mbila yafumatu ku Jitanda ja Lesa, inge ne kechi twafwainwa kwikyamba ne.

²⁸ Pano, kimye kyo tubena kufunda Binembelo, aye wamwene mba myaka sebete yailenga na kupwa. Nanchi, aye byo ajinga konka myaka sikisite-eiti, kwashajile myaka ibiji kulutwe poso Lesa wabwezha bantu Banji mu ntanda yabo.

Mu kimye kyo a lombelenga, twatana kuuba mba kwajinga Malaika wabulume waishile kufuma Mwiulu. Bushe mutnu uji yense wakonsha kwita Jizhina Janji nyi? [Kipwilo kyaamba mba, "Ngabaliela."—Waku.] Ngabaliela. Kabiji Aye ye Malaika wa ku kipwilo kya ba Yudeya. Baanga bayuka kyokyo? Konse konse, ke Ngabaliela. Ngabaliela ye muluwe ku kipwilo, kipwilo kya Buyudeya; wayishile kwi Maliya; Aye waishile kwi Zakaliya. Kimye kyonse, ke Ngabaliela. Kabiji Aye ye umo Malaika mukatampe wa Mwiulu. Bushe Aye kechi waletele lwimu lwawama kwi Mulongo wetu Danyela lwafuma kwi Lesa! "Oo, Danyela, watemwikwa bing!"

²⁹ Bushe kyokyo kechi kyakonsha kukulengela kwikala wawama ne, pa kulanguluka mba Lesa wakutemenwe? Inge kechi Najinga watemwikwa bingi ne, Nafwainwa kutemwa kuyuka mba Amiwa batemwako pacheche Kokwa, kechi ibyo nenyi? Kine. Kijitu na... Aye undanguluka amiwa, mu kimye kimo, kyakonsha kundengela kukeba kubijika, ne kulanguluka mba Aye wanta muchima. Kabiji tuji na luketekelo lwa kuuba mba Aye wituta muchima, mambo, "Kimye kyo twakijinga bandengamumbo, Kilishitu wafwile mukifulo kyetu," mulongo. Kabiji, pano, atweba twajinga bangi kwi Lesa, pano witulenga atweba kufwenya kwipi na Lesa kabiji witupa luketekelo lwa lupulukilo lwetu, ko kuuba mba, Mupashi Wazhila. Kabiji na lwitabilo mu kyokyo lwitushikwila peulu ya bintu bya pantanda, kabiji twenda peulu yabyo. Akyo kya kyakila mu kuwama. Kechi ibyo nenyi? Kijitu bulongo.

³⁰ Mu kimye kya milombelo, Ngabaliela waishile na kumubuula mba kechi kujitu myaka ibiji yonka ne kasa bakyangye kubwela ku kyaalo kyabo ne, pakuuba wamubujile

Iwendo lonse lwa kyokya kyaalo. Kilangulukaipo! Lwendo lonse, lwendo lonse lwa pantanda, Ngabaliela walumbulwile kwi Danyela. Waambile mba Aye watumwa nakubuula Danyela kikye kintu kikatampe. Nga awa ngauzhi wikyumvwine byepi! Kabiji wamubuujile mba kuji myaka sebete yatongwelwa bantu benu, kufikatu ne kupelo; ayo ke mpelo, nanchi kwapwa, ke mpelo ya byonse. Aye waambile mba, “Kuji milungu sebete.”

³¹ Bamo bafikizha bibye ku bang'ondo, bamo ku moba, bamo...Uu! Inge kijitu milungu, mujitu pepi nobe bibiji bya kibese kimo pa bina mu mwaka, nangwa kimo kibese pa bina. Kabiji, monai, anweba...Apo ipo potwafwainwa kutana, pa kuuba mba kikale kya bukishika.

³² “Milungu sebete yatongwelwa bantu benu.” Na mambo aka? na kika? Bantu bakwang’anyi batongwejilwe bibye? Danyele bantu banji, ba Yudeya. Kabiji kika kyo kyatongwejilwe? Kechi pe Danyela yenkatu ne, kabiji ne pa muzhi wazhila wakwa Danyela; monai, muzhi wazhila wakwa Danyela. Pano, jibumba, muzhi wakwa Danyela wajinga muka? [Kipwilo kyaamba mba, “Yelusalema.”—Waku.] Yelusalema.

³³ Kabiji pano tusakusenda, kape kufikako bufuku buno: Yelusalema wajinga kwepi? Ng’anyi watatwile Yelusalema? Bushe mwakilangulukapo pa kyokyo nyi? Ing’anyi watatwile Yelusalema? Kimye ka kyo atatwile? Tusa kufikako, pa kakimye kacheche. Ng’anyi watatwile Yelusalema? Mulongo, ke kintu kicheche kyafiwa ku koona, bino kine Kibuulang’ana. Ee, mwane. Ing’anyi watatwile Yelusalema, kabiji kimye ka po atatwilwe? Kijitu bulongo. Kabiji awa ye muzhi wazhila wakwa Danyela.

³⁴ Kabiji twayuka mba awa muzhi, ao waikala pano ke jifingo pa myaka tuu sauzande, ukashimukululwa ne kune-ngezhiwa jibiji. Kabiji bupopweshi bwa mu tempo bukobiwa byonka byo kyajinga ku ntendekelo. Abyo ibyo. Yelusalema ukekala, pano, kabiji kukekala kitapisho, kitapisho kya pa juba pa juba nobe byonka byo kyajinga ku ntendekelo. Tusa kufika mu byavula bya mu byobyo, Naketekela, bufuku buno, nangwa byavula bya kyokyo.

³⁵ Pano Nakeba mba anweba muyuke, balunda, amba, kwamba pa bibye bintu, Amiwa mbena kushapo lufunjisho lwa milungu. Bino ke kuubatu nobe kukwatakotu, pa kuuba mba inge kwatalala, nangwa palutwe kacheche, inge twafika mu Tutetesho Tutanu na tubiji, Michiba Itanu na ibiji ya myalo, Matolopita Sebeni, abyе bintu byonse, byo Nakonsha kubwelako kunyuma ne kwaamba mba, “Bushe mwavuluka pa milungu sebete ya kwa Danyela? Bushe mwavuluka nkulo ya Kipwilo, byo yatatwile kokwa, kabiji ne byamwekele?” Kabiji aaye milungu sebete yakwa Danyela iji mu kimye kufuma pa kuya kwa Kipwilo kufika ne pa kubwela kwa Kipwilo. Akye

kyo kimye kyo kyasenda. Pano, pano, kechi yonse milungu ya kwa Danyela ne; lubajitu lumo lwayo. “Milungu sebete yatongwelwa.”

³⁶ Pano, kuji bintu bitanu na kimo bya lupepu Lwanji, na kumubuula bintu bikeya kufikizhiwa. Pano, kwajinga bintu bitanu na kimo bya kwiya Kwanji. Pano, bufuku buno, Naketekela mba tusakushila papo mu Binembelo byo twajinga nabyo lukeelo luno, apo paji bintu bitanu na kimo. Pano potuji. Pano twatana kuuba mba kwajinga bintu bitanu na kimo, kimo kya mu bibye. Pano twayai tuye . . . -kyabu foolo kyapitala, na . . . -wabu foolo veeleshi . . . veeleshi wabu 24 wa kyapitala kyabu 9 kya kwa danyela.

Kabiji milungu sebete beitongwela bantu bobe . . .

Pano vulukai, alo lo lonse lwendo lwa bena Isalela lo bakekala nalo pano pantanda. Batongwelwa jimo. Milungu sebete yatongwelwatu jimo. Yo yonka yapanwa ku ba Yudeya.

...pa bantu benu kabiji ne pa muzhi wenu wazhila, . . .

Onkao mambo, aye milungu sebete, pano kechi kimupite ne, kikasolola kufuma mu kyokya kimye kufika ku mpelo ya Bayudeya, kabiji ne mpelo ya Yelusalema, poso kukekale muzhi wakatataka washimikwa. Pano, oo, Naketekela tukatwele mu kyokyo, kyawama bingi ne kuya mukuzhika bufuku buno.

...beitongwela bantu bobe kabiji ne muzhi wenu wazhila, . . . (Kuuba ka?) . . . mu kukanya mizhilulwila, . . .

³⁷ Kika kyo amubuujile Aye pano? Aye wakebelenga kutana mba kwashala bimye binga. “Nayuka mba tuji mukimye kya kumpelo.” Nobe byo kiji pakino kimye ne atweba, “Nkambo . . .”

³⁸ Baanga muno mu jibumba, bufuku buno, baketekela mba tuji mukimye kya kumpelo? Ambai mba, “Amena.” [Kipwilo kyaamba mba, “Amena.”—Waku.] Nemusachila. Tuji kumpelo. Pano tubena kukeba kutana, kupichila mwi Lesa, bimye binga bikekalako. Juba ka jo tubena kwikalamo? Oene mambo kyo tubena kubwelela kunyuma na kutola babo bangauzhi, ne bikwabotu, na kukeba kuyuka pepi po tuji.

³⁹ Kabiji abyo Danyela byo aubile. Aye watajile kilungi kyanji kwi Lesa. Baanga batanga Danyela 9 leelo? Sutulai maboko enu. Kijitu bulongo. Anweba mwamona milombelo yanji, byo esolwele na mambo a bantu banji, kabiji ne kwisolola kwanji ayemwine. Aye wakebelenga kushinikisha kuyuka kimye kya kubwela kwabo, mambo wakebelenga mba bantu benengezhe kubwela.

Pano, kyo Mbena kweseka kuuba, ke kuyuka kimye kyakuya, ne kunengezha bantu kuya, aba benengezha. Kabiji twatazha bilungi byetu kwi Lesa, monka mu milombelo kabiji ne

misashijilo, pakuuba mba tuyuke, “Nkambo, ng’anyi kimye kyo tubena kwikalamo?”

⁴⁰ Twamona byonse bye bintu byapusanapusana bibena kumweka; twamona ntanda iji mulukatazho. Twamona mba kimye kyafwenya pepi. Kuji k-...kuboko kwanembwa pa lubumbulu, bintu byonse byaambile Lesa. Tubena kumvwa Ndamakyaalo wetu ubena kwamba pa nkondo ikwabo, ibena kwiya ponka pano. Tubena kumvwa byakwambila jimo, “Monka, oo, mu ma awala achedetu pa kupwa kwa nkondo, kyatongwejilwe jimo amba byaalo byonse bikekalatu ke lukungu lwakufuma mu mushiji.” Kabiji twayuka mba tuji nakyo.

Nanchi twayuka, akyo kasa kikyangye kubiwa ne, Kipwilo kyafwainwa kuya. Nanchi, “Nkambo, tuji pepi?” Ao o ene mambo o Naketekela mba Aye uketuyukisha. Twasutula bilungi byetu amba tuyuke. Pano, kitanshi, twayai tutane bishika.

Milungu sebete beitongwela pa bantu benu...muzhi wenu wazhila, ne mu kupwisha mizhilulwila, ...ne mu kukanya bundengamambo, ne mu kufuchila bubi, ...ne mu kuleta bololoke bwa myaka, ...ne mu kushinka na katetesho bimwesho ne bungauzhi, ne mu kushingapo manyi apa pene Pazhijisha.

⁴¹ Abyo byo byajinga bintu bitanu na kimo bya lupepu lwa kwa Ngabaliela.

⁴² Pano twayai tutatule, nambala wanu. Inge mubena kukeba kwi kinemba, anweba muji na mapezulu. Nambala wanu, “Mu kukanya mizhilulwila,” akya kyo kintu kitanshi. Pano, mu kukanya mizhilulwila ya Isalela, ao wazhilulwile kwi Lesa, kikekala kya kufumyako bumbulwa kaloka bwa Yakoba.

Pano, pa kutana kikye, twayai tuzhikule ku bena Loma. Kyapitala kyabu 11 kya bena Loma, kabiji kutatwila pa veeleshi 21 wa bena Loma 11. Pano tubena kuya kuka? “Kukupwisha mizhilulwila.” Loma 11:21. Kijitu bulongo.

Mambo umvwe Lesa wabujile kwiichibako ine misapi ne,... (Wajinga ng’anyi? Isalela.)...obewa...kechi ukakuleka ne.

Pano, Nasaka namba, inge mwaya ku nzubo, mukutange kyonse kyapitala kyabu 11. Amiwa mbena kutanga bibye pakuuba...Bikai kayukilo mu kyapitala kyonse kyabu 11, ne kwikitanga.

...kechi ukakuleka ne.

Nanchi aki tala ku lusa...ne kukushita kwa Lesa: kwi boba baponene, ...pakuuba kwi obewa, lusa lo lwamweka, umvwe ukelwe mu lusa lwanji: umvwe ne...ne obewa bakakuchibako, nobewa bakakuchibako.

Kabiji ne abo nabo, umvwe ne kukelwa mu- . . . umvwe ne kukelwa mu milengulwila ne, bakebasokankanyamo jibiji: mambo aye Lesa wakonsha kwibasokankanyamo jibiji.

Monai, babena kubulang'ana mba kukekala kimye kya kwibachibako ba Ngetila, kabiji Isalela ukabwela jibiji.

Mambo umvwe obewa bakuchibile ku—ku kichi kya mungye (Bangetila), *kabiji obe bakusokankanyamo mwabulwa kufwainwa kuuba . . .*

Atweba twajinga babula kufwainwa, benyi, babujile lusa, babujile Lesa, babula luketekelo ne. Kabiji Lesa, konka ku lusa Lwanji, mu kupana kimye kwi atweba, bachibako waoloka Isalela mambo a mizhilulwila, kabiji wibashiile kumbaji, kya mungy- . . . kichi kya olivi kya ku muzhi, ne kuletamo kichi kya olivi kya mungye, mwabula kufwainwa kubila ne.

. . . kichi kya olivi . . . kyawama: kabiji ino byo iji misampi ine, kechi kikakijishepo kwiisokankanya, mu kichi kyayo ayo ine nenyi?

Kijitu bulongo, twayai tutwajijile kutanga.

Mambo kechi Nasaka namba, balongo, amba mulube kino kyafyamika ne, kuchina mba mwaketota mu maana enu anweba bene; namba kukosa kwa michima kwibaponena bena Isalela bamo, kwibaponena bena Isalela, poso kuvula kwa ba Ngetila . . . kufikile.

⁴³ Poso Lesa wapwisha na Bangetila, Isalela wapofwelwe meso. Abo batwelele mu bubi ne mizhilulwila kwi Lesa, mambo Lesa wapofwele meso abo, pakuuba mba atweba betusokankanyemo. Mwikyuvwa nyi? veeleshi wabu 26 pano:

Kabiji byonkabyo bena Isalela bonse bakapuluka: . . .

⁴⁴ Lesa wibapofwele meso na mambo aanweba ne Amiwa. Abo kechi bakosheshe kumona ne, mambo akuuba mba Lesa wibapofwele meso. Kabiji bena Isalela bonse, Isalela wakine, bakapuluka. Pano Malaika waambile mbaka? Lukumo! “Ne mu kupwisha mizhilulwila ya Isalela! Naiya na kukubuula amba kukekala kimye mizhilulwila yabena Isalela po ikapwa.” Lesa ukachibako awa musapi wa mungye, kabiji ne kusokankanyamo, kubwezha, awa musapi wakine jibiji.

⁴⁵ Oo, kimye kimo kilengela muchima wami kukiluka, pa kwibamona bakamulanda, bantu bayanda bachibiwako, kechi bayukile ne kobailenga ne; kabiji ne kulanguluka mba Lesa, mu lusa Lwanji, waubile kyokyo pakuuba mba Amiwa mpuluke. Bapofwelwe meso kwi Mesiyasa wabo, bashikile matwi abo pakuuba mba kechi bakonsha ku mumvwa Aye ne; nangwa byonkabyo, bamwenenga pa byakukumya Byanji ne pa bintu byo Aabilenga.

⁴⁶ Mateyo, Naketekela, kyapitala kyabu 12, nangwa 8 nangwa kyapitala kyabu 12, waamba mba, "Nangwa Yesu waubile bya kukumya byavula, bino kechi baketekejile ne." Mambo, Lesa waambile mba, "Baji na meso kabiji kechi bakonsha kumona ne, kabiji ne matwi bino kechi bakonsha kumvwisha ne; kana bakonsha kumona na meso abo ne kumvwa na matwi abo, Amiwa nakonsha kwi balulula." Bino, pakuuba mba atweba twikale na kimye, Aye wabwenzhezhe kipembe pansi ku meso a baana Banji Mwine, wafungileko baana Banji Mwine kufuma ku tebulu, kabiji wibalulwijile ku Mupashi wa kwi babandamika, amba Aye wakonsha kutana . . . mba twafwainwa kwikalala na kimye kya kwikalala na bumi, ne kwitupa Bumi. Veeleshi wabu 26, ne jikwabo.

Kabiji bena Isalela bonse bakapuluka: monka mo kyanembelwa mba, Kabiji mukafuma Mupokolweshi mu Ziona, kabiji ukafumyako bumbuluwa koloka kwi Yakoba:

⁴⁷ Ee, Aye ukeya ku Mutumba wa Ziona, juba jimo. Pa Mutumba wa Olobeta, abo bakamuyuka Aye, kabiji bena Isalela bonse bakamuyuka mba ye Iye. Ba Ngentila bakekala bapwa pa kyokya kimye. Awa musapi ye basokankanyamo, Lesa ukafumyako bipangwa bya bungizhiwa. Kabiji awa musapi wa mungye ukekala . . .

⁴⁸ Kabiji pano vulukai, kunyuma byo mubena kutanga, Aye waambile mba, "Umvwe mizhazhi yajinga yazhila, kabiji aya mizhazhi yajinga Mizhazhi yazhila, ne apo kipangwa kyafuma ku Muzhazhi wazhila ukapanga kipangwa kyazhila." Kabiji inge awa Muzhazhi wajinga Yesu Kilishitu, Aye ye byonse bibiji Muzhazhi ne Kisaka kya Davida; inge abwa Bumi bwajinga mwi Aye, bwaishile mu kisemi kya Buyudeya kabiji bwachibilweko kwi abo, kabiji meso abo apofwelwe pakuuba mba tumone, bumi bwetu bwafwainwa kupashang'anya na Musapi wapeshiwa. Oo, ee, mulongo. Abyo ibyo.

⁴⁹ Lesa wibachibikileko, na mambo a kintu kimo, ne kupofula meso abo pakuuba mba twikale na jishuko jakumona, kupana kimye kwi atweba. Kabiji twendauka nobe paji byo tuji. Paulo wibabula papo, "Kasa mujimuka, byo muba kyokyo. Jimukai! Mambo umvwe Lesa kechi walekele misapi ine ne, Aye ukekala byepi na lusa na kichi kya mungye akyo kyaikela jimo . . ."

Nanchi twenda nakuzhokoloka, ne kwaamba mba, "Amiwa ne Presbyterian! Amiwa ne Methodist! Amiwa ne Baptist! Amiwa ne Pentekosito!" Akyo kechi kyalumbululapo kintu nangwa kimo kwi Lesa ne. Obewa wafwainwa kusemwa jibiji ku Mupashi Wazhila awa wafumine ku Muzhazhi. Bino Aye waishile . . .

⁵⁰ Pano, vulukai, Aye kechi ubena kutongola ba Ngentila ne. Amiwa mbena kubikamotu kikye pakuuba mba ba Ngentila bekale na kimye kyabo.

⁵¹ Bino, Aye wayishile “na kupwisha mizhilulwila,” na kwibupwisha. Pano, inge twabwela monka mwi Danyela ne jikwabo, tusakutana kuuba mba mu Danyela, twatana papo, veeleshi wabu 24. Kijitu bulongo. “Ne mu kupwisha mizhilulwila.” Mukupwisha ka? Mu kupwisha mizhilulwila ya kwa Isalela.

Kuzhilulula ko kuka? Ke kubula kukokela kintu kimo. Kuzhilulula kwi amiwa, ke kuuba kintu kyatama kwi amiwa. Kuzhilulula kwi obewa, ke kuuba kintu kyatama kwi obewa.

Nanchi, Isalela waubile kyatama kwi Lesa. Kabiji mu yuwe mulungu wa makumi atanu na ibiji, kika kikamweka? Lesa ukapwisha mizhilulwila ya kwa Isalela. “Kupwisha mizhilulwila,” kikekala, “kufumyako bumbulwa koloka kwi Yakoba.” Kabiji yense Isalela ukasemekwa jibiji. Bonsetu bakatambula Mupashi Wazhila.

Pano, nambala ya bubiji, nembai pa kipepala kyenu.

⁵² Twakonsha kwikala kimye kyabaya pa kyokyo, bino kechi Mbena kukeba kusapwila pa kyokyo ne. Nasaka kwamba kwi anweba, pakuuba mba mwikyumvwishe bulongo. Inge twafika mu tutwe Tutetesho Tutanu na tubiji, nanchi po mukapitamo mu Kipwilo, kupita mu Tutetesho, kupita mu Myalo, kabiji mukayuka pepi po twaimana. Kijitu bulongo.

⁵³ Nambala ya bubiji, “Ne mu kukanya bundengamambo.” Pano twayai tutange ne jikwabo, Danyela.

...mu kupwisha...mizhilulwila, ne—ne kukanya
bubi, . . .

Akyo kyo kintu kya bubiji kya kwiya kwanji. Kitanshi, kupwisha mizhilulwila ya Isalela; kabiji ne kukanya bubi. Kwepi isalela ko alengele mambo? Kwepi kobalengele bubi bukatampe? Kwepi ko be abenyé abo bene na Lesa?

⁵⁴ Pano telekai bulongo. Twayai tuzhikule mu Mateyo Wazhila 24. Kabiji apo ipo Isalela po aubile kilubo kyanji kileta lufu. Apo ipo po aubile bubi bwanji bwapelako, kabiji oene mambo kyo a ikajila tuyewa musango leelo. Mateyo, kyapitala kyabu 27 kya Mamboawama a Mateyo Wazhila, kabiji ne veeleshi wabu 25 wa kyapitala kyabu 27. Twayai tutatwile nobe pa—nobe pa veeleshi 21.

*Kabiji mwine ndamakyaalo wibepwizhe mba, Ng’anyi
wa mu bubiji bwabo ye musaka ne mukasulwile?
Kumvwa abo amba, Balabasa.*

Bino vulukai, awo ye Isalela. “Balabasa!”

Pilato wibambile mba, Nanchi ikika kyo Nsakuuba . . . ne Yesu watelwa mba Kilishitu? (Batelekai!) Kumvwa bonse amba, Bamupope ku musalabu.

Vulukai, awo ye Mesiyasa wabo waambile Danyela mba ukeya. Vulukai lukeelo luno, mu lufunjisho papo, “Aye ukachibiwako, kechi na mambo Anji mwine ne,” kafwako nangwa kimo kyo Aubile ne.

. . . *Lekai bamupope ku musalabu.*

Kabiji awa ndamakyaalo waambile mba, Kika, ng’anyi bubi bo auba? Kepo babijikishe bingi, amba, Bamupope ku musalabu.

Kabiji Pilato byo amwene mba kechi nakonsha kwibakanya ne, bino . . . kiwowo kikatampe ke kibuke, aye watambwile meema, ne kowa ke owe ku maboko ku meso a jibumba, ne kwamba mba, Amiwa ne fungako ku mashi a yuwe muntu waoloka: monai . . . kimonai.

⁵⁵ Telekai! Apo po paji kilubo kyabo. Apo po paji bubi bwabo.

Nanchi bakumbwile . . . bantu, ne kwamba mba, Mashi Anji ekale pe atweba, kabiji ne pa baana betu.

⁵⁶ Apo ipo po bekyubijile. Aye wakainyenga bubi bwabo. Aye Wakonsha kuuba kintu kikwabo byepi kanatu kwibalekela mambo, byo ayukile mba Aye ye wibapofwele meso, pakuba mba atweba tutwelemo? Kijitu pamo nobe baana Banji babena kwita Mashi Anji. Kabiji abo bapofwelwe meso, kabiji Aye wayukile mba beba pofula meso. Ao oene mambo Aye kyo abijikijile lulekelo lwa mambo pe abo. “Balekelaiko mambo, Taata, mambo kechi bayuka kyo babena kuba ne.” Bapofukile meso. Na mambo a atweba kyo baubilwe bumpofu. Mu kubula luketekelo kwabo mo baubijile kikye. Bino byo Bakamumona jikwabo . . . Amen!

⁵⁷ “Kukanya bundengamambo.” Bundengamambo kyo kika? Kubula luketekelo. Abo kechi baketekejile mba awa wajinga Mesiyasa ne. Abo kechi bamumwene Aye amba ye Mesiyasa ne, nangwa byonkabyo Aye waubile kiyukilo kyonse Mesiyasa kyo afwainwa kuuba. Bino abo kechi bekimwene ne. Bajinga bapofu.

⁵⁸ Nanchi inge mwamona bantu baamba mba, “Amiwa kechi naketekela mu lubuko lwa Bulesa ne. Amiwa kechi ne kimona ne. Amiwa kechi nelumona lubatizhilo lwa Mupashi Wazhila ne.” Kechi mwakonsha kwibazhingijila ne; abo ke bampofu. Baamba mba, “Amiwa kechi namona Mbila ya Kwiya Kwanji ne. Amiwa kechi namona lubatizhilo lwa Mupashi Wazhila ne. Amiwa kechi namona lukunwa wa mulolo ne. Amiwa kechi nebimona bibye bintu ne.” Bampofu, kabiji ne kwikiyukatu ne. Balombelelaitu. Kijitu bulongo.

⁵⁹ Mu kubula luketekelo lwabo; bino, inge Aye bamumona, byo Akeya jibiji, kikalengela kukanya kubula luketekelo kwabo. Oo,

ami! Twayai tuzhikule patanshi mu Ntendekelo 25, kyapitala kyabu 45, kabiji twikale na—na kipasha kya kikye. Nanemba papo bimo, bya mu Ntendekelo 45, anweba mubena kunemba byambo. Oo, byo Natemwa ao Mamboawama akala! Kijitu bulongo. Bino twayuka pepi po tuji.

Mwakonsha nkung'umvwa bulongo, kunyuma ya kishimikwa? Sutulaiko kuboko kwenu inge mwakonsha nkung'umvwa. Njina kikye kyaikala pepi.

⁶⁰ Pano tusakutanga kibese kya kikye Kinembelo. Nasaka namba muteleke, anweba mwabula Baibolo wenu. Anweba muji na Baibolo wenu, ke Ntendekelo. Patanshi, twayai tutampe mu kyapitala kyabu 44, kutatwila pa veleeshi wabu 27.

⁶¹ Ke Yosefwa, kabiji Yosefwa wajinga kipasha kyalumbuluka kya Kilishitu. Twayuka kyokyo. Baanga bayuka kyokyo? Bamushikilwe balongo banji. Kika? Mambo aye wajinga wa bumupashi, aye wamwenenga bimwesho, ne kulumbulula biloto. Aye wajinga muntu wa bumupashi mukachi ka balongo banji, kabiji bamushikilwe. Kabiji bashanji bamutemenwe.

Nanchi ne Yesu bamushikilwe ku bipwilo bya madinominesheni, bino bamutemenwe kwi Ba Shanji ba Lesa. Kika kyo bamushikilwe Aye? Mambo Aye wajinga wa bumupashi. Mambo... Abo baambile, amba Aye ke muntu ubulang'ana biji mu bumi bwa bantu, diabola.

⁶² Anweba vulukai byaambile balongo ba kwa Yosefwa? "Awe wiya awa kalota." Mwamona? Monai, kintutu kimo. Kabiji bapoteshe Yosefwa pa mutengo umo Yudasa ye apoteshepo Yesu, masiliva sate. Bamutayile mukimbo, kabiji bayile na kubuula bashanji amba kintu kimo kyamwipaya, wafwa. Bino aye bamusendele kufuma mu kimbo. Kilishitu bamubikile mu kimbo, kabiji bamufumishemo. Kabiji kufuma popa wayile pa kifulo kyalepesha bingi pano pantanda. Amena! Yosefwa waile ku kuboko kwa kilujo kwakwa Felo; kabiji Yesu waile ku kuboko kwa kilujo kya Lesa. Mu kwesekwa kwanji, kutumbijkwa kwanji kasa kukyangye kufika ne... Yesu, Aye kasa akyangye kutumbijkwa, wapichile mulweseko.

⁶³ Kika, Naketekela wajinga Billy Sunday, musapwishi mukatampe, waambile mba, "Kyonse—kyonse kichi kwajinga ba Malaika milyoni baikajileko, aja juba ja kupopwa pa musalabu, waambile mba, 'Kasulula kuboko Nkobe utongole kuno ko tuji. Atweba tusa kukingya byonse bibena kumweka kuno.'" Bino Aye kechi wikyubile ne.

⁶⁴ Kefasa waambile mba, "Aye wipulusha aye mwine; bakwabo kechi wakonsha kupulusha ne." Aye kechi wayukile mba ubena kwamba ng'ambilo ne. Inge Aye wipulwishes Ayemwine, Aye kechi wakonsha kupulusha bakwabo ne. Nanchi, Aye wipaine Ayemwine, pakuuba mba apulushe bakwabo. Mwamona, nanchi wajinga bingi mpofu ku kyokyo. Bino abo...

⁶⁵ Kabiji pano byo atumbijikilwe, nangwa, kasa akyangye kutumbijikwa ne, kwesekwa kwanji. . . Vulukai, Yosefwa wabikilwe mu kaleya pa kubulwa kulengamambo.

⁶⁶ Awa mwina Loma, nangwa, mushilikale wabena Isalela mukatampe, wajizhina ja Potifelo; Potifelo wayile, kabiji wafuminepo waya palwendo. Aye wajinga na mukazhi walamba, kabiji mukazhaji watumine Yosefwa mu nzubo na kubapo kintu kimo, kabiji waesekeshe mba Yosefwa obepo kintu kimo kyatama. Kabiji aye wajinga walukokelo kwi Lesa. Ne mubuula, kimye kyonse. . .

⁶⁷ Anweba banabakazhi, Amiwa ng'amba pe anweba; pano Mbena kwamba pe anweba, pa mineti umo. Mwamona? Mwanamukazhin ke kipe kyanekena. Nayuka mba kechi kwakonsha kwikalala mwanamulume watama kwakubula mwanamukazhi watama ne. Pakuuba banabalume bayuka kyokyo, banabalume bayuka mba obewa wi mwaana wa Lesa, kabiji washukilwa mwanamukazhi, kikulenge buvu; nangwatu obe kyamusango ka. Aye ke kipe kyanekena, kabiji mwayuka kyokyo. Inge waya, ke obe byubilo byabula bya inetu, musendai kukuboko ne kwamba nanji nobe nyenga. Obewa wi mwaana wakwa Lesa. Kechi mwibyube bintu byatama ne. Monai kwi Yosefwa, aye wajinga kyakumwenako kwi anweba.

⁶⁸ Kabiji muka Potifelo, awe mwanamukazhi walamba, wamushingi, wapeulu pene, umo wa banabakazhi ba peulu badingamo mu kyaalo, wamusashijile ne kumupachikizha. Kabiji waalulukile, kabiji wamukazhi wa mukwachile ne ku mukosela. Kabiji wamushijikile poso wandosa ne kochi wanji, ne kunyema kufuma kwi aye. Ee, mwane. Kabiji byo abwelele, bamubepejile, kwamba mba wamutwelejile mukachi na ku mwinngijisha, kabiji washile wanji. . . ne kusha kochi wanji monka mwa. Kabiji na mambo akyokyo watailwe mu kaleya. Bino, mu kaleya, Lesa wajinga nanji, nangwatu bamutule kwepi.

⁶⁹ Aye wajinga kipasha kya mwaana wabubile. Bintu byonse byaubile yosefwa byajinga na bubile. Kabiji Yesu byo akabwela mu Myaka kiumbi kimo, ao oene mambo biselebwa bikamvwikwa na maluba. Bintu byonse byo Oba bikekala na bubile. Aye ke Mwaana wabubile. Konse ko mwabika Yosefwa, kwapeshiwi. Konse kuji Yesu, kwapeshiwa. Nanchi, Aye muleta mu muchima obe kabiji ukapeshiwa.

⁷⁰ Nanchi twatana kuuba, mba, Yosefwa wabikilwe mu kaleya. Kabiji mu kaleya mwajinga banabalume babiji; umo waonaikile, kabiji mukwabo wapulukile. Yesu, mulweseko Lwanji lwa pa musalabu, umo nkapondo waonaikile kabiji mukwabo wapulukile.

⁷¹ Kimye Aye kyo atumbijikilwe, Wayile ku kuboko kwa kilujo kwa Lesa. Kimye Yosefwa kyo atumbijikilwe, wayile ku kuboko kwa kilujo kya kwa Felo, kabiji kafwako wakonsha kwamba kwi

Felo kwakubulwa kwamba kwi Yosefwa ne kutambula nsambu patanshi ne.

Kabiji Yosefwa byo ashile kipango...Oo, ami! Kimye Yosefwa kyo ashile kipango, tolopita yavumine, kabiji banabalume batangijilengako lubilo, ne kwamba mba, "Mufukaminai manungo pansi! Yosefwa ubena kwiya!" Amena!

Kabiji inge Yesu wafuma mu kuboko kwa kilujo kya Mfumu mwiulu, ntolompita ikajila. Kabiji manungo onse akafukama, ne jimi yonse ikashimuna mba, "Yesu ubena Kwiya!" Kine! Pakuuba inge...

⁷² Kabiji, vulukai, kimye kyo bamukaine balongo banji, kika kyo aubile? Aye watolele mukazhi wa mu ba Ngentila; watolele mukazhi mwina Ijipita. Kimye Yesu kyo achibilweko ku balongo Banji kunyuma kokwa, ba Yudeya, Aye wasongwele Musongwa Ngentila. Bino pano, pakupitapo myaka, panyuma ya kusemekwa kwa baana, Efulemu ne Manase, wajinga na kisemi.

⁷³ Nanchi, juba jimo, balongo banji baishile na kumupepula. Talai. Twayuka jishimikila, byo abikile ka kintu kacheche momwa, pa kubwezha. Kabiji wamwesheshe nobe kechi wakonsha kwamba ne mulaka wabo ne; wajinga na wakututulula, wa Kihebelu, bino kasa ajinga Muhebelu aye mwine. Kabiji mulongo wabo waishile. Abo kechi bamuyukile ne. Aye wajinga mfumu wabulume.

Kabiji ponkapano, Kilishitu inge wapepula Bayudeya, wabuka bakolwa baabo ne bintu bikwabo, kabiji nangwa byonkabyo kechi bayuka kana Aye Yeng'anyi, awa Mesiyasa.

Twayai tutatwile pa veeleshi wabu 27 wa kyapitala kyabu 44.

Kabiji bakalume benu bataata baambile kwi atweba mba, Anweba mwayuka mba mukazhi wami wansemejile—mukazhi wami wansemejile baana babalume babiji:

Kabiji umo mwiabo wafumine kwi amiwa, . . .

Awa wajinga Yosefwa, yenka ye baambilengapo.

. . . kabiji Waambile mba, Kine aye waabanwapo mu bipimvwa; kabiji kechi Namumonapo kufuma pa kyokya kimye ne:

Kabiji umvwe mwasenda ne yuwe kufuma kwi amiwa, kabiji kintu kyatama kya mumwekela, mukalengela suki yami yamvwi kwikala na bulanda bwa nkutwala ku kilende.

⁷⁴ Bajinga na Benjamena wamucheche kokwa, kasanji. Mwayuka Benjamena ye aimenako nyi? Aje jibumba ja beene, ba Yudeya bakishika babena kubungakanu pamo na kulenga

ba aduleendi foote-foolo sauzande, akye—akye kisemi kibena kwiya. Kechi baabo bajimbijimbi batanwa mu Mukwakwa Wakibumba ne, ine, ine; aba ke bakuya ku lonaiko. Aba kechi Bayudeya ne. Aba kechi Bayudeya ne. Beene ba Yudeya ke booba bena Benjamina bacheche babena kwiya kufuma kukwe, kabiji bakyangye kumvwapo Kyambo kya Yesu Kilishitu ne.

Onkao mambo iyai kwi amiwa...kabiji ne bashenu...ne ba taata, kasa twamubula mwanyike; mweo wabo byo akasankana na mweo wa mwanyike;

⁷⁵ Lesa Bumi Bwanji bwakaswa pamo na Isalela. Aye wasongolwa kwi aye. Tusa kufika mu kyokyo mu mamineti achechetu, inge Nkambo waswa. Aye wasongolwa kwi Isalela. Bumi Bwanji bwakaswa kwi aye. Kijitu pamo nobe Amiwa byo nakaswa kwi Mrs. Branham kunyuma kokwa, bakazhi bami, kabiji obewa wakaswa ku bakazhi bobe. Bumi bobe bwapombwa mu kikye. Kabiji Lesa wasongolwa kwi Isalela. Kabiji kyajinga kika? Yakoba waambile mba, “Bumi bwami bwapombwa muyewe mwanyike. Amiwa...”

Kabiji byo bakamona mba, mwanyike kechi tuji nanji ne, . . .

Yosefwa wakebelenga kulama mwanyike, mwayukatu. Twayuka jishimikila.

. . . kabiji abo bakafwa, bashanji: kabiji bakalume benu bakalengela suki yamvvi ya bakalume benu bataata na bulanda bwa kuya ku kilende.

Telekai kululwe lusashijilo lubena kupana Lubenyi.

Mambo amiwa kalume wenu nalyishetu kwi bataata...na mambo a aye mwanyike, namba, Inge Nabula kumuleta...kumuleta kwi anweba, nanchi Amiwa kekala na mambo kwi bataata myaka yonse.

Pano onkao mambo, Nalomba mba anweba, lekai kalume wenu ekale kukila mwanyike . . .

Oo, ami! Monai, aye waimanatu kumeso akwa Yosefwa, mulongo wanji. Awe ye Yosefwa, kabiji kechi wamuyuka ne. Oo, pembelelai poso aya Myaka kiumbi kimo ikatatule, mulongo!

. . . pano mukifulo kyakuuba mba mwanyike alete bulanda kwi nkambo yami; . . .

Telekai kwi aye, byo abena kumutela mba, “nkambo.”

. . . kabiji lekai mwanyike aye na balongo banji.

Mambo Amiwa kaya byepi ku bataata, kwakubula mwanyike? kuchina mba Nakamona kyatama kyakonsha kwibamwekela bataata.

⁷⁶ Kasa abena kusashijila, na kupana bumi bwanji aye mwine! Abo ba Yudeya byo bakemana kokwa na maboko abo asutulwa!

Monai. Monai pano wabu 45, veeleshi . . . Telekeshaitu bulongo, kechi kimupite ne. "Kimye Yosefwa kyo . . ."

Kabiji Yosefwa kechi wayukile bya . . . -kanya—kwikanya aye mwine ku bonse baimene nanji ne; . . .

Mulongo akyo kyo kimye bundengamambo po bakebukanya. Bumbulwa luketekelo po bukapalang'ana.

. . . kabiji wajijile, ne kukambizha bantu bonse mba bafume . . . kwivi amiwa. Kabiji kechi kwajinga muntu nangwa umo waimene nanji ne, kimye Yosefwa kyo eyukishe aye mwine ku balongo banji.

⁷⁷ Kyo kika? Ne mukazhi wanji naji wabwelele ku kipango. Oo, ami! Aye Musongwa uji mu Lukumo, kimye Yesu kyo akabwela (Atweba tusakufika pakyokyo muno.) na kwiyukisha Ayemwine.

Kabiji wajijile kyakosa: . . .

Yosefwa kechi wakonsheshe kwikanya kimye kyabaya ne, kabiji wajijile.

. . . kabiji bena Ijipita ne ba mu nzubo ya kwa Felo be kyumvwine kye.

⁷⁸ Kyayile kufikatu ne mu kipango, bamumvwine Yosefwa na kujila. Pano, akya kyajinga kipasha kya Kilishitu ku kumanya Bayudeya, kyakuuba mba, Aye wayuka mba Wibampofwile pakuuba mba atweba twikale na kimye. Bino Aye byo akeya kwi abo jibiji, bubi bwa Isalela bukapwa.

Kabiji Yosefwa waambijile balongo banji mba, Amiwa ne Yosefwa; . . .

Mwalanguluka mba Yesu ukamba mbaka? "Amiwa ne Mesiyasa wenu. Amiwa yami Iye mwapopele."

. . . bushe bataata bakiji na bumi nyi? Kabiji balongo banji kechi bamukumbwile ne; mambo bajinga bakumya ku meso anji.

⁷⁹ Oo, Nafwainwa kwimana papo pa kakimye kacheche. Twayai tuzhikule mu Zakaliya kyapitala kyabu 12. Zhikulai pamo ne amiwa mu Buuku wa Zakaliya, kyapitala kyabu 12 kya Zakaliya. Kabiji kape Mbenza kusenda kimye kyabaya bingi kyakutatula kusapwila pa kikye, bino Na—Naketekela kechi byo kiji ne. Kabiji Na—Nakeba mba anweba wikumvwishe, bingi bulongo.

⁸⁰ Zakaliya, twayai tufike pa kyapitala kyabu 12 kya Zakaliya, kabiji monai byo Akamba kimye Aye kyo akemana ku balongo Banji. Zakaliya 12, kabiji ne wabu 10. "Kukanya bundengamambo," pano. Kijitu bulongo, kyapitala kyabu 12 ne veeleshi wabu 10.

⁸¹ Monai. Kabiji pano ubena kwamba papo pa bashalapo; kuzhokoloka Yelusalema; lukinyama ne mazhita afumishiwapo,

kabiji ne bikwabotu; bintu byonse byafika kumpelo pano; apo kijitu pepi kufikila Myaka kiumbi kimo, pano ke kukeba kutatula kwa Myaka kiumbi kimo.

Kabiji Nkebapa ba mu kisaka kya Davida, kabiji ne bekala mu Yelusalema, muchima wa (kika?) lusa . . .

Amena! Lusa lwakukumya!

. . . ba mukisaka . . . bekala mu Yelusalema, (Danyela “muzhi wanji wazhila”), muchima wa kuuba lusa ne wa misashijilo: kya kuuba mba byo bakamutala ye baasa, bakajila mabingo na mambo a aye, byonka bijila muntu wafwisha mwananji wa mulume umotu ye aji nanji, ne ku mujila kingitu, byonka bijila muntu wafwisha mubeji wanji.

⁸² Telekai, kukekala kujila kwabaya bingi kimye Aye kyo akemana kokwa, byo abena kwiyukisha Ayemwine kwi abo, nobe byaubile Yosefwa! Telekai.

Kabiji mu joja juba kukekala kujila kwine kukatampe mu Yelusalema, byonka byo bajijile ku Hadada- . . .

Amiwa kechi nakonsha kwijitongola bulongo jizhina ne, H-a-d-a-d-r-i-m-o- . . .

. . . Hadada-limona mu . . . Magido—mu kimpachiko kya Megido.

Kabiji bonse ba muntanda bakajila, pa kisemi pa kisemi bunke; ba mukisemi kya kwa Davida pa bunke bwabo, ne bakazhi babo nabo pa bunke bwabo; ne ba mu kisemi kya Natana pa bunke bwabo, kabiji ne ba mukisemi kyabo pa bunke bwabo;

Ba . . . kisemi kya Levi . . . ne bakazhi baabo ne bisemi byabo pa bunke bwabo; . . . kabiji Shimiyona ne kisemi kyabo pa bunke bwabo;

Kabiji ne ba mu bisemi byonse bikwabo byashalapo, byonse bisemi . . . ne bakazhi baabo pa bunke bwaabo.

⁸³ Bakalengeshiwa bingi buvu abo bene, byo bakemana popa kabiji ne pakumona mba yenka Umo ye bapopele ne ku mukana, waimana popa, yenka wabo Yosefwa wawama. Kukekala kujila kwabaya bingi! Kabiji bakamba mba, “Mwafumishe kwepi Anweba ayo mikovu?”

⁸⁴ Aye waambile mba, “Mu nzubo ya balunda Nami.” Mwamona mo Nekitazha nyi? Mu kukanya bundegamambo, kubula lwitabilo, akyo Aye kyo akeshila.

⁸⁵ Kabiji awe ke mwaka wabu sebete wakwa Danyela, mulungu wabu sebete, nangwa byonkabyo, kwiya na kukanya bundengamambo, kwibufumyapo. Mwaumvwa pano nyi? Kitanshi kika? “Kupwisha mizhilulwila.” “Kukanya

bundengamambo.” Nambala fiili, “Ne mu kufuchila bubi.” Anweba mubena kunemba.

Najinga na Binembelo bikwabo sikisi papo, pakuuba ne bipitailatu, mambo kwakaba. Atweba kechi tukeba kusenda kimye kyabaya ne. Nasaka kutwela mu byavula byo Nakonsha kuuba, bino kechi kwimulama bimye byabaya ne. Kijitu bulongo.

⁸⁶ “Mu kufuchila bubi.” *Bubi* ke “kuuba kyatama,” nobe byonka byo baubile pa musalabu. Aye wafuchile bubi, bino kechi kikatongwelwa kwi abo ne. Kechi kyatelejilwe abo ne. Kika? Mambo beba mpofwele meso amba babule kwikimona. Kabiji kika kyo baikejile bampofu?

Mwaamba mba, “Kyawama, kapopo, leelo... mambo Amiwa ne mpofu.” Obewa wi mpofu bwakwikebelo obewa mwine. Bajinga na bumpofu mambo Lesa wibampofwele. Pakuuba obewa wimpofu mambo wisakila obewa mwine. Kechi pajipo kufuchila nkobe ne. “Inge kechi waketekela mba Amiwa yami Iye ne,” byo byaambile Yesu, “obewa ukafwa mu bubi bobe.” Abyo ibyo.

⁸⁷ Pano twayai tubwele ku Zakaliya jibiji, kyapitala kyabu 13. Pano twayai tuteleke papo. “Ne kufuchila bubi.” Pano, kwepi kwe... Nakebelenga muntu umo, umvwai kikye—umvwai kikye, bino kapopo Nkambo usa kwikyubila mujishinda jimo.

Mu joja juba tuke...

⁸⁸ “Mu joja juba.” Dr. Scofield uji napo po anemba papo, nangwa mitwe yatatwilako kibaba, “Aba bashalapo... Bashalapo balapila batongwelwa ku musalabu.”

⁸⁹ “Mu kufuchila bubi.” *Bubi* ke “kintu kyo wauba kyatama, akyo kyo wayukisha bulongo, amba kechi wafwainwa kwikyuba ne.” “Inge Naimita bubi mu muchima wami, Lesa kechi ukangumvwa ne.”

⁹⁰ Pano, mu Zakaliya kyapitala kyabu 13, twayai tutatwile pa veeleshi 1—pa veeleshi wabu 1.

*Mu joja juba kukekala nsulo itupauka yo
bakebashikwila ba kisaka kya Davida ne booba bekala
mu Yelusalema ya kwibatokesha ku bubi...ne ku
bubipisho bwabo.*

⁹¹ Kukekala nzubo yashikulwa. Yangatu kulutwe; twakonsha kutwajijilatu na kutanga. Nasaka namba anweba mubikepo kayukilo pakuuba mba mukatangepo. Bino pano, Amiwa njina kayukilo papo pa kutatwila veeleshi wabu 6 kabiji kutanga kufika ne wabu 10. Kijitu bulongo, twayai tutange pano tumone, kutanga kufika ku 9, byonkabyo.

*Kabiji umvwe umo wamwipuzha mba, kwepi... Bino
bilonda biji mu kuboko kobe byafumapi? Ponkapo
aye ukamukumbula mba, Abyo... byo Nji nabyo*

byafumine . . . (Twayai tumone) . . . mukumbu, Abyo byo Bandemekele mu nzubo ya balunda nami.

Buka, Obewa mpoko, umulwische kafunga wami, kabiji yenka ye naikala nanji pepi, byo byaamba aye YEHOBÀ wa mabumba: mutapai kafunga, mikoko ipalang'ane: kepo Nkabwezha kuboko kwami pa baana ba bacheche.

⁹² Pano, Yesu watongwele Kinembelo. Mwamona, "Mutapai Kafunga, mikoko ipalang'ane." Bino monai kibaba kyalondelapo. Aye waambwiletu kyabaya. Pano monai byambo byalondelapo byo byaamba, lubaji lwalondelapo. "Kepo Nkabwezha kuboko Kwami pa baana ba bacheche." Kika? Aja jibumba ja kwa Benjamina jibena kwiya pakino kimye. "Nkepo kabwezha kuboko Kwami ku baana ba bacheche."

⁹³ "Tapai Kafunga." Isalela, patanshi, Isalela watapile Kafunga, mikoko yapalang'ejilemo mwaya ntanda yonse. Bino Lesa waambile mba, "Nkepo kabwezha kuboko Kwami, pakuuba mba kalete ba bacheche mu juba jikapelako." Kimye ka? Kufuchila kwa bundengamambo po bukobiwa.

⁹⁴ Isalela ukapuluka, bonsetu ba mwiabo. Twayai tuzhikule mu Isaya. Aye Isaya, kyapitala kyabu 66 kya Isaya, kabiji tutanetu pa ka kimye kacheche. Kabiji mumone byaamba Lesa pa kupuluka kwa Isalela, kikasenda bimye binga pa kupulusha Isalela. Monai bukiji bukijitu byo kikeya. Mu Isaya, kyapitala kyabu 66 kabiji na veeleshi wabu 8. Inge mubena kukeba kwikitanga kyonse, kijitu bulongo.

*Ng'anyi waumvwinepo kala kintu kya byonkabyo?
ng'anyi wamwenepo kala kintu kya byonkabyo? Nanchi
ntanda yakonsha kusemwa . . . juba jimo . . . mu juba
jimo nyi? . . . mambo Ziona ponka pa kumvwatu
bisanso, wasemene bana banji.*

⁹⁵ Ponkapotu Ziona byo amwene mba awa wajinga Mesiyasa wabo, wasemekelwe jibiji, mu juba jimo. "Mu kufuchila bubi, ne mu kufuchila mizhilulwila, ne bubipisho." Oo, ami! Baubile kintu kyabubi, kyajinga kyatama. Kufuchila kwa bubi kwa ubiwe.

⁹⁶ Nambala foolo. "Kuleta bololoke bwa myaka." Akyo kyo kintu kya buna kyo Aishijile. Kyabu foolo, kika kyo Aishile na kuuba, "Mu—mu kuleta bololoke bwa myaka." "Ne mu kukanya bundengamambo; kufuchila bubi; ne kuleta bololoke bwa myaka." Kimye mizhilulwila yabena Isalela byo ikapwa . . . Kimye mizhilulwila yabena Isalela . . .

⁹⁷ Pano tubena kuya ku . . . Mbenya kukeba anweba mukwatakanye kikye, mambo umvwe twaleta yewa mwanamukazhi, ne nsung'unyi watailwe kufuma mwiulu, musa kubwela jibiji ku kikye Kinembelo kimo. Shinikishai amba Mwakinemba. Umvwe mizhilulwila ya Isalela yapwa,

Satana, ao mushinawishi wabo ne mushinawishi wetu, Satana bakamushikila mu kalengwa kabula kupela. Kimye ka? Mu kimye kya kuleta bololoke bwa myaka, kintu kikabula kupela, bonse baubanga bumbulwa koloka bakafumishiwapo.

⁹⁸ Twayai tuye mu Lumwekesho kyapitala kyabu 20 ne veeleshi wabu 13, paka minetitu umo, kabiji twayai tutange papo pa kaminetitu kamo. Lumwekesho 20, ne 13...Ine, Nalomba lulekelo lwa mambo. Lumwekesho...1 kufika pa 3, byo kiji. Amiwa kechi naji kumona ka kiyukilo kaji pakachi ne. Masulwila ami atwela mu meso ami. Lumwekesho kyapitala kyabu 20, kabiji twayai tumone.

*Kabiji Namwene malaika kasa ekila kufuma mwiulu,
waji na bakii ba kalunga kabula kupela ne munyololo
mukatampe mu kuboko kwanji.*

*...aye wakwachile sung'uniyi, awa muloolo wakala,
ao ye diabola, ne Satana, kabiji wamukashile myaka
kiumbi kimo,*

*Kabiji wamutaile mu kalengwa kabula kupela, wa
mushinka ne ku mushinkapo, ne kubikapo katetesho
peulu mo aji, amba kechi ajimbaike mikoka ya bantu
jibiji ne, poso aya myaka kiumbi kimo ikapwe:
pa kupita ino myaka...kyafwainwa akakasululwe
kakimye kacheche.*

⁹⁹ Kuleta bwa myaka... “Kuletamo bololoke bwa myaka,” Satana uji mu kalengwa kubula kupela. Kabiji Aye byo akooba kyokyo, ne kumushikilamo na katetesho diabola ao wajimbaikilenga bantu.

¹⁰⁰ Pano twayai tuye ku Habakuka, kyapitala kyabu 2. Habakuka, kyapitala kyabu 2. Kabiji pano tusakumona kine kintu Aye kyo a kashijile awa muloolo wakala, kabiji ne kyo kyaubijilwe byobya, kabiji ne bikamweka panyuma ya kubikapo ne katetesho. Natemwa kikye, kechi ibyo nenyi? Ki—kituletelala maana amo amo. Habakuka, Habakuka, kyapitala kyabu 2 ne veeleshi wabu 14, Naketekela byo kiji, Nakeba kutanga. Umvwe kikye kyaubawa... Tajishai.

*Mambo pano pa ntanda pakakumbana maana
akuyuka lukumo lwa YEHOBA, byonka byakumbana
meema mu kalunga.*

¹⁰¹ *Brrrrr!* Ami! *Yii!* Mu mulaka mukwabo, umvwe mulwanyi wafumishiwapo, mpelo ya bubi ikafika, ne kuletamo kwa bololoke bwa myaka nishi kwafika, Satana washikilwamo ku kalunga kabula kupela, kabiji maana akwa Yehoba akakumbana pa ntanda ponse byonka byakumbana meema mu kalunga. Amena! Lukumo lwikale kwi Lesa! Kibena kwiya, mulongo, kibena kwiya! Banabakazhi bakekala bainetu, ne banabalume bakekala bashetu. Amena!

Umvwe maana a Nkambo akakumbane
pantanda ne pakalunga ne mwiulu;
Kabiji, oo, muchima wami ubena kubiza,
ubena kujila na mambo ajoja juba jawama,
Kimye Yesu wetu kyo akabwela pantanda
jibiji.

¹⁰² Amena! Kijitu bulongo. Pano, Myaka kiumbi kimo nishi yafika. Akyo kyo kimye Myaka kiumbi kimo, Muzhi po akashimikwa. Kyabu foolo... Njina pepi nobe sikisi Binembelo bikwabo, bino tusakupelawizha. Pano, inge twabwela, Nkatola bibye bikwabo Binembelo; bino kwimupatu buyuke bwavula.

¹⁰³ Nambala faivi. “Ne mu kushinka na katetesho bimwesho ne bungauzhi.” Monai, awa Malaika kwiya na kushinka na katetesho kimwesho ne bungauzhi.

Amiwa—Amiwa nashikwa kwamba kikye. Bino, umo munembeshi mukatampe, Natangilenga juba jikwabo, inge kechi wikilubakenye ne! Aye waambile mba “Kyajinga kika...”

Pano, kyamweshatu byo abula maana... Oo, ndekelaiko mambo, Amiwa kechi natazha mukwamba kyokyo ne. Ndekelaiko mambo. Amiwa kechi natazha mu kyokyo ne, Amiwa kechi kechi ne kyuba ne. Ine. Awa—awa—awa muntu wabula kushingwa kwa manyi, monai.

Awa muntu waambile mba, “Anweba mwamona papo amba bimwesho ne bungauzhi byaswishiwetu ku kipwilo kya Kiyudeya.” Kabiji waambile mba, “Kufuma ku kimye kyakwa Danyela, kimye Danyela byo aishile, kyalumbulula amba kechi kujipo bimwesho nangwa bya bungauzhi ine.” Waambile mba, “Byonse bye binto leelo byo baambapo, na bimwesho ne bya bungauzhi, byonse ke bintutu bya diabola,” amba, “kechi kujipo kintu kya kuuba mba bimwesho ne bya bungauzhi ne.”

Mulongo, kwajinga ba ngauzhi bavula panyuma ya kwa Danyela. Kabiji kwajinga Yoano Mubatishi. Kwajinga Yesu Kilishitu. Kwajinga bangauzhi mu Lulayang’ano Lupya. Kwajinga bimwesho. Kwajinga Bamalaika.

Mujishinda ka mu ntanda pakuuba mba muntu ambe kyokyo? Bino, mwamona, akyo kiji na nkebelo yakwitemwa, kweseka kuleta kintu kimo pa bantu, kwikilenga ke lufunjisho lucheché lwa kipwilo, nangwa kintu kicheche kyabula kinto, pakuuba mba kikale kyaitabilwa ku bantu. Kabiji umvwe bantu kechi banji na Mupashi Wazhila ne, bakajimbaikwa kukikye.

¹⁰⁴ Pano, kechi tusende muntu byo aambile ne. Bino, kechi kujipo Kinembelo kya kushinikisha kyokyo ne. Nanchi Nakonsha kusenda byepi kyokyo? Kyawama, twayai tumone kubikwapo katetesho kyo kika. Talai! Aye wayishile na kuuba kyokyo, na kushinka na katetesho kimwesho ne bungauzhi.

¹⁰⁵ Pano, twayai tuzhikule mu Buuku wa Danyela, ponka potwajinga. Monka mu Buuku wa Danyela, tusakutana byonka byo Kyaambile. Pano twayai tuzhikule mwi Danyela kyapitala kyabu 12. Pano, nobe byo tubena kuya mu Danyela 12, pano, twakonsha kutatula. Kabiji kutanga kufuma pa... Inge mwaya ku nzubo, Nakeba mba anweba mutange kufuma mu veeleshi wabu 1. Twayai tutangetu kufuma mu veeleshi wabu 1, kufika ne ku veeleshi wa 4.

Kabiji pa kyokya kimye Mikela ukemana... mfumu mukatampe ao ukemenako baana ba balongo bobe:...

Pano, akye ke kimye kya kumpelo.

...kabiji kukekala kimye kya makatazho, akyo kyabujile kumwekapo kala kufuma ku kimye kyatatwile kwikalako... mukoka ya bantu...

Akye ke kimye kya antkilishitu, wakajila pa mbili wa Katetesho Katanshi, byo akafikizhiwa.

...ne kufika ne ku kyokya kimye ne:...

Kechi mu kimye Titusa kyo akundwile bibumba bya Yelusalema ne. Akye kyajingatu pa kifulo kimo. Monai yuwe antkilishitu, awa mfumu wafwajilwe kwiya, talai byo akeya.

...kufika ne pa kyokya kimye ne: kabiji pa kyokya kimye bantu bobe bakapokololwa, bonse bakatanwa mba banembwa mu buuku.

Aleluya! "Bantu benu," Isalela, "bakanembwa mu buuku."

Kabiji ne bavula ba muboba balala mu mushiji bakansanguka, bamo ku bumi bwa myaka, kabiji bakwabo ku buvu ne kumanyi-kwa kwa myaka.

¹⁰⁶ Kyafwainwa kwikala byepi mu ntanda kimye Titusa kyo akundawile nsakwa ya Yelusalema? Kyafwajilwe kwikala byepi? Kechi kyafwajilwe kwikala byobyo ne. Mwamona, aye ubena kwamba mu kimye kya kumpelo, pa lusanguko. Abyo ibyo nyi? Pano:

Ponkapo bamaana bakasama nobe kusama kwa jiulu; ne booba baluwila bakwabo... bavula ku bololoke... tubaangabanga twa mwiulu myaka ne myaka...

Telekai! Kiji bino, kya kine, kubikwa katetesho ka kine.

Pano obewa, Obewa Danyela, ushinke bino byambo, kabiji ubikepo ne katetesho pa buuku, poso kimye kya ku mpelo kikafike:...

¹⁰⁷ Kyokika? Oo, aleluya! Bushe mwikimona nyi, jibumba? Alwe lumwekesho lwa Yesu Kilishitu, kabiji ne Bulume Bwanji, bwa Kwiya Kwanji, bwa kimye kya kumpelo, lwashikilwe na katetesho kufika ne pa kino kimye. Abyo byo akeya na kuuba. Kyafyamika ku bafunda; kechi kyakukumya ne amba babena kwikibika, "kushinka na katetesho," kunyuma kokwa, kwa

“kubula bangauzhi,” kabiji ne bantu byonse kunyuma kwine. Kechi kyakonsha kulama meema ne. Bino kimwesho, akye kimwesho, kyabikwapo katetesho poso kino kyonka kimye. Kabiji apo ipo po Mbena kubika Iwitabilo Iwami, amba Lesa ukeisolola milungu sebete. Amena! “Bikapo ne katetesho,” Aye waambile mba, “poso kimye kya kumpelo. Shinka bino Byambo ubikepo ne katetesho pa Buuku poso kimye kya kumpelo.”

¹⁰⁸ Kika Aye kyo aubile? Kushinka na katetesho pa kimwesho ne bungauzhi! Danyela waawile bibye bintu. Aye wikimwene mu kimwesho, kabiji ne Malaika waishile na kubikapo katetesho pa kimwesho, kabiji ne kushinka na katetesho bya bungauzhi. Abo bakonsha kutanga, bino kuuba bekyumvwisha ne, poso kimye kya kumpelo. Kimye kya kumpelo, kimye kya kumpelo kyo kika? Yo mpelo ya mulungu wabu sebete, kimye awa mfumu, antikilishitu, po akasololwa, pakino kimye, ubena kwialula aye mwine ke Lesa. Twayuka byepi mba abyebikwapo katetesho kufika ne pa kyokya kimye? Danyela wapwisheshe; akye kyo kyapitala kyapelako kya kwa Danyela.

¹⁰⁹ Nyenga Simpson waji nkumbula ano mabaanga, waji kwamba mba, “Mulongo Branham, Natangile Buuku yense wa kwa Danyela. Amiwa—Amiwa kechi nayukilepo kintu ne byo Naimene, napwisheshe, kukila ne byo Nayukile kimye kyo Natatwile.” Byokiji pano, Nyenga Simpson, inge muji muno bufuku buno. Naketekela Namumona waikala popa. Amiwa kechi naambilepo kintu nangwa kimo mu kikochikala ne. Nazhindaminetu, mambo Nalangulukile mba kape Nakonsha kwikyuba.

Bino, kimwesho Danyela kyo amwene, kookwa ku mukola, kyashikilwepo na katetesho, “kufikatu ne kumpelo.” Ke... Lekai ngye kulutwe na kwikitanga papo. Mwamona?

Bino obewa, Obewa Danyela, kushinka bino byambo, kabiji ubikepo katetesho pa buuku, kanatu kimye kya kumpelo: bavula bakanyemena kuku ne kuku, kabiji maana akayanga na kunanuka.

Kabiji Amiwa Danyela natajile, kabiji, talai, kwaimene...babiji,...umo ku lubaji lumo...lwa mukola, kabiji umo kulubaji lukwabo lwa kitulu kya mukola.

Kabiji umo waambile ku muntu wamvwajile kya—kya lineni, wajinga pa meema a mu mukola, Kwakishala bimye binga kufika kumpelo ya bibye byakukumya?

Pano telekai.

Kabiji Amiwa naumvwine awa muntu wavwala kivwalo kya linenyi, wajinga peulu ya meema a mu mukola, byo asutwile kuboko kwanji kwa kilujo ne kuboko kwanji kwa kipiko mwiulu, kabiji wichipile kwi

*yewa waikala myaka ne myaka amba kwakishala kimye,
kimye kimo, kabiji ne kimye kya afu; . . .*

Pano, tuji bulongo—tuji bulongo, “Kimye, ne kimye kimo, kabiji ne kimye kya afu.” Pano monai inge twafika ku milungu sebete ya kwa Danyela, akyo po kyalupuka bulongo. Apo ipo kyafyamika po kikasololwa. Kijitu bulongo. “Kimye, ne kimye kimo, kabiji ne kimye kya afu.”

...*kabiji aye byo aka... (“aye,” ke ng’ambilo yakutazha ku bumuntu, aye antikilishitu) . . . ukafikizha pwisha- . . . ukapwisha ukapwisha kupalang’anya bulume bwa bantu bazhila, (akyu kyo kimye kyo akachibakenyamo lulayang’ano lwanji pakachi ka mulungu), byonse bye bintu bikafikizhiwa.*
(Amena.)

*Kabiji Naumvwine, bino kechi Naumvwishishe ne:
nanchi Amiwa naambile mba Ami, Anweba . . . Nkambo,
mpelo ya bibye bintu ikekala byepi?*

*Kabiji aye waambile mba, Yanga mujishinda jobe,
Danyela: mambo byambo bebishika kabiji bya bikwapo
katetesho poso kimye kya . . . [Kipwilo kyaamba mba,
“Mpelo.”—Waku.]*

Oo, kechi mulubeko kyokyo ne!

...*poso kimye kya kumpelo.*

*Bavula bakatokeshiwa, kabiji bakekala batoka, ne
kwesekwa; pakuuba babi bakobangatu bubi: kabiji
kafwako nangwa bambo babi bakomvwisha; bino
bamaana bakomvwisha.*

¹¹⁰ Ayo Mbila-ya kimye ikebisolola; aya nkulo ya kipwilo kyapelako. Lukumo! Yii! Abyo byokiji! Oo, ami! Kindengela kuzakama, pa kulanguluka pa kyokyo, kyafyamika! Bintu kipwilo kya muntanda byo batalapo meso abo, ne kwamba mba, “Kechi muji maana ne.” Kyafyamika kya Yesu Kilishitu wajinga Ng’anyi; kechi Muntu wabusatu ne, kechi Muntu wabubiji ne, kechi Muntu wabusatu ne, kana aye Muntu wabu Lesa. Byonse bye byafyamika bya kwa Lesa bikasololwa, mambo kyanembwa papo mu Buuku, kabiji kikasololwa mu kisemi kya kimye-kyakupelo. Abo kechi bakonsha kwikimona mu masukuulu a mamboawama, ne masukuulu, ne madinominesheni, kukila ne Bayudeya byo bakonsha kumona Yesu kwikala Mesiyasa. Kechi oene mambo ne kyo balangulukila mba wi wa konya. Kechi oene mambo ne kyo balangulukila mba wi wakosama. Oene mambo kechi bakonsha kumvwisha ne kika kyakubula kukwatakana nabo. Mambo, kuji Bulume ne kimwesho panyuma yakyo, Kyambo kya Lesa akyo kyasololwa, mu kuleta Kipwilo mu ndonda pakuuba mba kwikale Kushikulwa ne kuya Kumuzhi. Ee. “Bavula bakanyemena kuku ne kuku, kabiji maana akayanga na kunanuka.” Kyakine.

¹¹¹ Pano, ng'anyi kintu kikwabo kikayukanyikwa? Talai pa buleelo, pa bipwilo. Abye byokiji. Naketekela kechi kyakonsha kukozhang'ana ne, bino Nafwainwa kwi kyamba. Kulenga . . .

¹¹² Mu joja juba kukekala antikilishitu ukeya.

¹¹³ Pano, vulukai, inge twafika mu Tutetesho, benda pa bambili ba antikilishitu monka mwa mu Tutetesho. Danyela waambile papo, "Awa mfumu ukeya." Aye ukachibiwako, Yesu byo kikekala, mu kufuchila bubi bwa bantu. Pakuuba, "Awa mfumu ukeya, ye ukalengela kya bunya kileta lonaiko," awa wajinga Loma, kupichila mwi Titusa. Kabiji pa kikye kimye, ke mfumu ukufuma mu Loma, ukekyuba. Kabiji aye ukasololwa mukimye kya kumpelo, pano telekai, "ne kwilenga ayemwine kwikala Lesa," nobe Mupashi Wazhila byo etujimuna mu Tesalonika wa Bubiji, wabu 2.

Twayai tuye monka, mu Tesalonika Wabubiji, kabiji kechi ukekala na kyambo kyami ne kanatu Kyambo kya Lesa. Tesalonika wa Bubiji, kyapitala kyabu 2 ne veeleshi wabu 12. Twayai tumone. Tesalonika wa Bubiji, kyapitala kyabu 2 ne veeleshi wabu 12. Twayai tumone. Twayai tutatwile peulu ya kyokyo, veeleshi wabu 7.

*Mambo akya kyafyamika kya bumpupabizhila kibena
kwingga ne pano: . . .*

(Awe ke Paulo ubena kwamba, kupichila mu Mupashi Wazhila.) . . .

*kana—kana mambo onka ko aji umo wikikanya mu
kino kimye, poso byo bakamwangatapo.*

Aye ye "Ng'anyi" uno? Bushe uji yense wayuka nyi? Aye Mupashi Wazhila, "Aye wikikanya."

*Kabiji ponkapo (kimye ka) awa Mpupabizhila
ukamweka, . . .*

Kimye ka? Ponka pa kimye Mupshi Wazhila po akangatwapo, ao ubena kwinengezha kufumapo ponka pano. Kika Aye kyo abena kufuminapo? Kutwala Kipwilo Nanji. "Kusololwa!" Paulo ubena kwamba, kasa atundaikwa.

*. . . yenkawa ye akepaya Nkambo na muya wa
mukanwa kanji, kabiji ukamonauna na mambo a
kumweka kwa kwiya kwanji: (awa mpupabizhila, ee
kine)*

*Ne aye, kwiiya kwanji awa mpupabizhila kukayila
monka mwayila kwingga kwa Satana na bulume bonse
ne na biyukilo bya bubela,*

"Atweba twi kipwilo kyakila mu bukata. Tuji na *kikye*. Tuji na *kikye*. Anweba bonse ikasai pamo," mwamona. "Atweba twi bakila." Bubela bwakukumya!

Kabiji ne na... bujimbijimbi bonse bwabipa bwa kujimbaika boba babena kuya na konaika; mambo abo bakaine kutemwa byambo bya bukine, amba tupuluke.

Kabiji na onkao mambo Lesa ukebatumina kya kwibalubakanya, amba betabila kya bubela:

Kabiji amba... bakazhatwe babujile kwitabila bya bukine, pakuuba bamwenejilemo lusekelo mu bya bumbulwakoloka.

¹¹⁴ Bushe mubena kwikyumvwa nyi? Oo, ami! Pano, Paulo ubena kwamba. Kimye Katetesho ka Lesa pokabena kuyukanyikwa, Mupashi Wanji, Jizhina Janji, lusa Lwanji, byonse bye byafyamika bikatampe bibena kubiwa pankino kimye, mu Kipwilo Kyanji pakuuba mba kiye mu Kushikulwa; kwitulwila kwa Mupashi Wazhila kwauba kikye. Abyo Aye byo auba mu moba akumpelo.

¹¹⁵ Pano, twayai tumone. Tuji na kimye kya kikye kyapelako nyi? [Kipwilo kyaamba mba, “Amena.”—Waku.] Kya butanu na kimo, “Kushinga manyi peene Pazhila.” Oo, ami! Apano paj iye! Kintu kyapelako kyo Afwainwa kuuba, ke kubaka? Pano, twayaitu tubwele kunyuma kwi Danyela, tumone byonse byo Akooba. “Milungu sebete.” Kika kikafikizhiwa mu kino kimye? Kijitu bulongo.

...ya tongwelwa pa bantu benu ne... muzhi wenu wazhila, mu kupwisha mizhilulwila (mizhilulwila ya bantu), ...ne mu kukanya bundengamambo (bwa bantu), ne mu kufuchila bubi bwabo, kabiji ne kuleta bololoke bwa myaka (ku Bayudeya), kabiji ne mu kushinka bimwesho ne bungaузhi (poso kufika ku kimye kya kumpelo), ne mu kushingapo manyi apa peene Pazhijisha.

Abyo byo binto bitanu na kimo bya kwiya Kwanji.

¹¹⁶ Pano, “ne kushinga manyi apa peene Pazhijisha.” Bino, akye kyakonsha kwikalala kintu kyenyi kicheche pa kamineti, kwi anweba bavula bafunjishi, bino kikwachijilaitu pa mineti umo, mwikimone byo kisakwikala.

¹¹⁷ Akwe ke kushingwa manyi, kechi kwa muntu ne. Yesu washingwa kala. Abyo ibyo? Aye Buuku wa Byubilo waamba mba Lesa washingile manyi Yesu na Mupashi Wazhila; Aye waile na kuuba byawama, ne kubuka bakolwa, ne bikwabotu. Yesu aye, waubiwa kala. Aye ye Mesiyasa. Kabiji *Mesiyasa* kyalumbulula mba “Washingwa manyi.” Abyo ibyo nyi? Bino kuno mu kimye kya kumpelo, Aye ukashinga manyi peene Pazhijisha.

¹¹⁸ Kyalumbulula ka “peene Pazhijisha”? Mujishinda mo ne kimwena, akyo kyo Naketekela mba Nakonsha kwikishiniikisha na Kinembelo, ke kushinga manyi “peene Pazhijisha,” akyo

kikekala ke Tabbanako wakwingijisha mu kimye kya Myaka kiumbi kimo. Pano telekai, mwamona kyo Nekitambwila. Walondololwa mu Ezikyo, kya—kyapitala kyabu 4, aye . . . Ine, Natazha mu kyapitala kyabu 43, veeleshi wabu 1 ne wabu 6. Twayai tubwele ku Ezikyo tumone byo apana kipikichala kyanji kya mu Myaka kiumbi kimo, byo bakashinga manyi . . . Ezikyo 43, kabiji twayai tutange pacheche ne kumona Aye kyo akoba mu iye Myaka kiumbi kimo, kushinga manyi. Mu Ezikyo mu 43, kijitu bulongo, kabiji pano twayai tutawile nobe veeleshi wabu 1, kufika ne ku veeleshi 6. Mwfawainwa kutanga kyosetu pa kufika ku nzubo, nangwa byonkabyo, anweba mubena kunemba, Ezikyo 43. “Palutwe . . .”

¹¹⁹ Pano, talai, ndondolwelo ya Tempo ikashimikwa mu Myaka kiumbi kimo. Pano, uji yense, utanga ao wayuka, kufuma mu Ezikyo kyapitala kyabu 40, poso kufika ne kyapitala kyabu 44, kafwako kikwabo mu ntanda ne kanatu Tempo wa mu Myaka kiumbi kimo ubena kushimikwa pantanda, (uji yense wayuka kyokyo, mwamona), inge lukumo lwa Nkambo lwikiyuzha, kabiji ne bikwabotu byonkabyo. Pano atweba . . . tubena kulondolola Tempo mu kyapitala kyabu 43, kabiji ne veeleshi wabu 1 kufika ku 6.

Panyuma yakundeta ku kibelo kyasakwa, ke kibelo kyatala ku musela:

Kabiji, talai, lukumo lwa . . . Lesa wa Isalela lwafumijile ku lubaji lwa jiya ku musela: kabiji jiwi jajinga pamo nobe jiwi ja meema avula: kabiji ne ntanda yasmine na lukumo.

Kabiji kyajinga pamo nobe mwenkelo ya kimwesho kyo Namwene, kiji pamo nobe kimwesho kyo Namwene byo Naishile na konauna muzhi: kabiji kimwesho kyajinga nobe kimwesho kyo Namwene ku mukola wa Keba; kabiji Naponene kutazha kilungi panshi.

Kabiji lukumo lwa YEHOBIA—lukumo lwa YEHOBIA lwaishile mu nzubo ku jishinda ja sakwa yatala ku musela.

Nanchi mupashi watwajile peulu, ne kutwezha mu lubaza wa mukachi; kabiji, talai, lukumo lwa YEHOBIA lwajujile mu nzubo.

Kabiji Namumvwine jiwi jaambile kwi amiwa kufuma mu nzubo; kabiji awa muntu waimene ku lubaji lwami.

¹²⁰ Kushingwa manyi, kushingwa manyi kwa Tempo wa bufumu bwa myaka kiumbi kimo. Pano monai mu bena Levi. Pano monai byo kyazhijilwe mubena Levi. Pano, inge twaya mu bena Levi, twatana kuuba mba Mosesa washingile manyi ku tempo. Twayai tubwele kunyuma kasa tuji pa kikye. Tuji na kimye kyabaya bingi. Twayai tubwele ku bena Levi ne kutana kimye Mosesa po ashingile manyi tempo, mu Benalevi kyapitala kyabu 8.

¹²¹ Oo, Natemwatu kwesakanya bibye Binembelo na Binembelo. Kechi mwikitemwa nenyi? Kabiji pano obewa—obewa ujitu na—na—na mulanguluko wa bintu byo tubena kukeba kabiji ne byo tubena kuuba. Pano, uji yense mwi anweba mwavuluka mba tubena kwingijishatu Kinembelo apo ne papo, pa kikye.

¹²² Pano, kyapitala kyabu 8 kya Bena levi, kabiji Njina kyo nanemba papo, veeleshi wabu 10. Monai Bena levi 8:10. Twayai tumone.

*Kabiji Mosesa wasendele manyi, ne kusasa manyi,
kabiji wasashile manyi ku tabbanako ne byonse
byajingamo, ne kwibizhijika.*

*Kabiji . . . wasupijile pa kitapisho bimye sebeni, . . .
washingile manyi kitapisho ne bijilo byonse, apa bino ne
pa muchiba ne ku maulu anji, mu . . . mu kwibizhijika.*

*Kabiji waitulwijile . . . manyi pa mutwe wakwa Alona,
ne kumushinga, na ku muzhijika.*

¹²³ Mosesa, monka mungyetu, wazhijikilenga, nangwa kushinga manyi ku tabbanako wa bupopweshi, wa baana ba Isalela kimye kyo bajinga mu lwendo lwabo. Lwajinga lwashingwa manyi.

¹²⁴ Pano, mu Byambo bya moba Wabubiji, zhikulaiko, kabiji tusakumona kuzhijikwa kwa Mupashi Wazhila byo atolele kifulo Kyanji mu tabbanako, kabiji monai byamwekele. Mu Byambo bya moba Wabubiji kyapitala kyabu 5, kabiji twayai tutatwile pa veeleshi wabu 13. Byambo bya moba Wabubiji kyapitala kyabu 5, ne kutatwila pa veeleshi wabu 13.

*Kabiji kyaishile . . . kufikizhiwa, matolompita ne ba
nyimbi byo . . . byo baimbile kya mumo . . . mitotelo ne
mu kusachila aye YEHOBA; kabiji byo basaswile mawi
abo na matolompita kabiji ne masimbo ne byombesha
bikwabo, mu kumutota aye YEHOBA, ne kwimba, Mambo
aye wawama; kabiji lusa Iwanji lo lwayaya: kabiji nzubo
yayujile na jikumbi, yo nzubo ya YEHOBA;*

*Nanchi aba bang'anga baimene . . . ba ng'anga kechi
bakonsheshe kwimana na kwingila ne mambo a jikumbi:
mambo lukumo lwa aye YEHOBA lwayujile mu nzubo ya
Lesa.*

¹²⁵ Lesa waishile mu nzubo yazhila yo bazhijikilenga, kabiji yapainwe kwi Aye mambo a bantu kwiya na kumupopwela. Nanchi, kushinga manyi, kechi “pazhila” pa mpuzha, pakuuba kushinga manyi “peene Pazhijisha” pa kifulo. Kabiji twamona, mba, Yelusalema Mupya yo “mpuzha ya kijisha Kuzhila” pa kifulo. Kabiji kushingwa manyi kukekala pa Yelusalema Mupya ao ukekila kufuma kwi Lesa monka Mwiulu, wanengezhiwa jimo nobe musongwa wamvwajila jimo mulume wanji. Kushingwa kwa manyi kukekala pe abo.

¹²⁶ Pano, kimye Zelubabelo byo a zhijikile tempo wanji, panyuma ya ku mushimukulula, kechi washingilwe manyi jibiji ne, mambo pajinga pa shingwa kala manyi; kabiji pakundawilwe, kabiji pajingatu pa kushimukulula jibiji. Lono lwaishile kuyoya nzubo. Bakambizhiwe jibiji amba bashimukulule, nanchi kechi kwajinga kushingwa manyi ne jikwabo ne. Kasa yajinga yashingilwe manyi ne jikwabo, akwa konka kwasendelwe, kwtwajijilatu kufika ne pa kino kimye. Pakuuba inge Lesa waimika Tabbanako wa mu Myaka kiumbi kimo, Aye ukashinga manyi peene Pazhijisha; kechi “yobe ne,” pakuuba “peene Pazhijisha.”

¹²⁷ Pakuuba kimye Mfumu kyo akatola Jintanda Janji pa myaka kiumbi kimo, (Lukumo!) aye wapwa pano. Kushingwa kwa manyi kukekala kintu kyapelako kubiwa. Kimye Tabbanako po ikashimikwa; lusanguko nishi lwafika; ba Yudeya babwela jibiji; Kilishitu ne Musongwa Wanji baiya; aye Muyudeya, ba aduleendi foote-foolo sauza nde baji na katetesho; Myaka kiumbi kimo yaubiwa. Kukekala kushingwa kwa manyi kimye peene Pazhijisha byo pakashingwa manyi; pazhila, Mwazhila mwazhijisha, kabiji ne peene Pazhijisha. Umvwe, peene pa kifulo Pazhijisha yo nzubo amo Lesa mo aikelenga, pakachi kaba Kelubi. Kabiji, kino kimye, Kilishitu ukekala peene Pazhijisha, na kushingwa kuji pe Aye. Kabiji kechi bakeba juba ne, mambo Mwanamukoko mukachi ka Muzhi ukekala Kyeya. Juba kechi jikazhikanga mu yewa Muzhi ne, byonka byaambanga Mwisho Jim. Kabiji kechi kikobiwa ne, mambo Kilishitu ukekala ke kyokya Kyeya, awa Washingwa manyi. Kabiji Mfumu ukeya ne kutola Jintanda Janji pa myaka kiumbi kimo, mu kwikalala pa bufumu.

¹²⁸ Yelemiya 3:12-18, kunungakanyatu, twayai tutange. Monka mu Yelemiya kyapitala kyabu 18, Naketekela. Ee. Ine, kyapitala kyabu 12, ndekelaiko mambo, kyapitala kyabu 12 kya Yelemiya, kabiji twayai tutatwile na—na... Yelemiya 3, ndekelaiko mambo. Yelemiya 3, Na—nanemba papo, kwepi, kimye kyo tubena kufunda, aye Mupashi wazhila ubena kwenda mwi amiwa kufuma pa kifulo kimo ne kuya pakwabo, Naji kunemba bibye mo Nafwainwa kubila. Yelemiya 3, kabiji pano 12 ku 18, kunungakanya. Twayai twikitange.

*Yanga ukambe bibye byambo ku kabela kabuyeke, ne
kwamba mba, Bwela, obewa Isalela wabwela munyuma,
byo byaamba aye YEHOVA; kabiji Amiwa kechi kaleta
bukaji bwami—bwami... kufikila pe anweba ne: mambo
Amiwa ne walusa, byaamba aye YEHOVA, kabiji Amiwa
kechi katwajijila kwikalala na bukaji myaka ne myaka ne.*

*Anweba itabaitu bubi bwenu, bo mwazhilulwile
kwi YEHOVA Lesa wenu, kabiji wasalang'anya
mashinda enu onse ku mwenyi munshi ya kichi kya
mazhaamatamba, . . .*

Abyo byo baubile, kufuma ku musela, ku muzhika, kyaalo kyonse. Mwamona?

... *kabiji anweba kechi mwakokejile jiwi ne, jiwi jami, byaamba aye YEHOBA.*

“Zhikulai!” Telekai ku kikye.

Alulukai, Anweba mwabwela panyuma baana, byaamba aye YEHOBA; mambo Amiwa (n-a-s-o-n-g- -) . . . Amiwa nasongolwa kwi anweba: . . .

“Meso abo amvwetwapo, mambo Amiwa napana kimye ku Bangentila. Bino, anweba bwelai, mambo Amiwa na songolwa kwi anweba.”

... *kabiji Amiwa nkemusenda umo wa mu muzhi, kabiji babiji ba mu kisemi kimo, . . .*

Kechi bonse betela abobene mba Bayudeya bakatwelamo ne. Pakuuba jibumba jasalwa jikatwela, awa Benjamena mucheche ukeya ku meso akwa yosefwa, aja jibumba kufuma mu kyaalo kyonse, umo kufuma mu muzhi, kabiji kufuma mu kisemi.

... *kabiji Amiwa ke mubwezha mu Ziona:*

Kabiji Amiwa ke mupa kafunga monka mwayila muchima wami, ao ukemujisha na maana ne kukwatakanya.

Kabiji kikeya kufikizhiwa mba, byo mukavula ne kusemununa muntanda, mu ooa moba, byaamba aye YEHOBA, abo kechi bakambapo ne, Aja—aja jikwachi ja lulayang’ano lwa YEHOBA: kabiji kechi kikeyako ku milanguluko yami ne: nangwa abo kechi bakekivuluke ne; nangwa kechi bakoba mba—mba bekipepule ne; kabiji kechi kikobiwapo jibiji ne.

Pakyokya kimye baketa Yelusalema mba njitanda ja YEHOBA; (Aye byo akekakalo, mwamona), kabiji ne byaalo byonse bikabungakena (aleluya) kwi akyo, kabiji ne jizhina ja YEHOBA, ku Yelusalema: kabiji kechi bakenda mwayila milanguluko yabo ya michima ya bubi ne.

¹²⁹ Akye kyo kimye Muzhi po akashingwa manyi. Akye kyo kimye Yelusalema Mupya po akassingwa manyi. Kabiji mikoka yonse ya Muzhi . . . Mu Lumwekesho kyapitala kyabu 22, waamba mba bizhilo bikekalangatu byashi bufuku, mambo kechi kukekala bufuku kokwa ne. Kabiji bonse bamfumu ba panopantanda bakalata munema ne lukumo mu yuwe Muzhi. Sakwa yayo ikekala ya yasipa ne saladisa, misango ya mabwe twelufu; kabiji bizhilo twelufu bikekala bya golonde, kimo kimo. Kechi mukekala kukeba tundulu momwa ne. Kechi kukekalapo kyeya kya juba ne, mambo Mwanamukoko uji mukachi ka Muzhi ukekala Kyeya. Kabiji Aye ukatangijila bantu Banji mu Bumi bwa myaka ne myaka. Amwa mukekala bichi bibiji

byaimana, kikwabo kulubaji lumo lwa mukola, kabiji bikekala ke byalubuko lwa kyaalo. Awa ye mushingwa Umo ukeya, Muzhi Wazhila kasa ekila kufuma kwi Lesa Mwiulu, kasa abena kwiya pano pantanda.

¹³⁰ Twayai tumone bintu bikobiwa mu kyokya kimye. Oo, bushe obewa wikitemwa nyi? Twayai tuzhikule mu Isaya 65, paka minetitu umo. Kyawamisha bingi pakuuba mba ne kipitaile. Kyawamisha bingi kwikishapo. Kwaikala kwakaba pacheche, bino twayaitu tuyenga kulutwe.

¹³¹ Isaya 65, telekeshaitu bulongo bintu bikobiwa mu kyokya kimye. Kabiji iyipuzhe obewa mwine, mulunda ndengamambo, inge obewa—inge wakonsha kupusa kikye. Isaya 65, twayai tutatwile nobe pa veeleshi wabu 17. Telekai, anweba bonse, kushika pano. Akye ke kimye kya Myaka kiumbi kimo, apa peene Pazhijisha bakashingo manyi.

Mambo, talai, Naya ndenge jiulu jipyne . . . ntanda ipya: kabiji bintu byakala kechi bikavulukwa ne, nangwa kwiyapo mu milanguluko ne.

Pakuuba pano . . . sekelai ne kusangalala . . . na mambo a byobya bintu byo Nsaka kulenga: mambo, talai, Nalenga Yelusalema . . . Nalenga Yelusalema, (awo ke Yelusalema Mupya), wa kusangalelamo, kabiji ne bantu bakekala ke ba kumwenamo lusekelo.

Nga kushingwa manyi kokuka? Lusekelo lwa Nkambo.

. . . ndenge Yelusalema wakusangalelamo, kabiji ne bantu banji bakekala ke bakumwenamo lusekelo. Kabiji Amiwa kasangalela mu Yelusalema, . . .

Aye Mfumu pa Jitanda, pa Jitanda ja bumfumu bwazhila, Jitanda ja Peenape, kabiji bantu ba Peenape bajii na lusekelo lwa Peenape mu Muzhi wa Peenape! Oo, ami!

Kabiji Amiwa kasangalela mu Yelusalema, ne lusekelo mu bantu bami: kabiji jiwi ja kujila kechi jikomvwanyikapo jibiji mwi aye ne, nangwa jiwi ja kujila ne.

Mwi aye kechi mukekalapo . . . mwaana wikala na bumi tumoba tucheche ne, nangwa mukote wabula kufikizha moba anji onse ne: mambo awa ukafwa kasa aji na myaka adeleendi ukafwa kasa akijitu mwanyike; pakuuba mubi ukafwa na myaka aduleendi ukafwa mambo wafingwa kwi Lesa mambo a bubi bwanji.

Kabiji bakashimika manzubo, ne kwikala monka; . . . bakajima majimi abo, kabiji bakaja bipangwa byabo.

Kechi bakashimika manzubo, mwaikala ungi ne; (ko kuuba mba, wafwa mwanobe wapingamo) . . . bashimika, ne mukwabo waikalamo ne; kechi bakajimba, ne mukwabo wajako ne: mambo byonka

bivula myaka ya bichi byo bikekala ne moba a bantu bami, kabiji bami basalululwa bakasangalala mu mingilo ya maboko abo.

Kechi bakengila kyatutu ne, nangwa kusema baana balukatazho ne; mambo bakekala mukoka ye bapesha kala kwi YEHOVA, kabiji ne baana babo nabo pamo.

Kabiji kikafikizhiwa kuuba mba, . . . saka bakyangye kwita ne, Amiwa kapana mukumbu; . . . (Akwa kushingwa kwa manyi kwa lukumo, kunyuma ya Kelubi!) . . . Amiwa kakumbula; kabiji kasa bakyamba, Amiwa nkoviwa.

Misuka ne mwanamukoko bakajilanga pamo, . . . bonkwe ukuja sono nobe ng'ombe mulume: ne lukungu lukekala ke kajo ka mulolo. Kabiji kechi bakakozhang'ana nangwa konauna mu mutumba wa wazhila ne, byo byaamba aye YEHOVA. (Mwakonsha kwipusa kye nyi? Ine!)

¹³² Tubwela jibiji kukwe, kabiji Isaya ubena kwamba jibiji, pa kyapitala kyabu 11, veeleshi wabu 1 kufika ne ku 9. Telekai kyo abena kwamba jibiji papo, byo amona kimwesho, panyuma ya kumona banabakazhi, monka mo bakobilanga mu moba apelako. Ni- . . . Kyawama, Isaya 11, kufika ku 1.

Kabiji musele ukalupukanku kishina kya Yesu, . . . ye Musapi ufuma ku mizhazhi yanji ne kukoma ukakoma: (Wajinga ng'anyi? Kilishitu.) . . . ku mizhazhi yanji:

Kabiji mupashi wa YEHOVA ukekala pe aye, mupashi wa milangwe, wa kukwatakanya, mupashi wa maana . . . bulume, aye mupashi wa maana ne . . . moyo wakwakamwa YEHOVA;

Kabiji ukamulengela kwikala wakukwatakanya bukiji bukiji moyo wakwakamwa YEHOVA: kabiji aye kechi ukachibamambo pa kumona na meso anji ne, nangwa . . . pa kumvwa na matwi anji:

Pakuuba na bololoke ukebachibila mambo bakamulanda, kabiji ne kulengulula bubi bwabo na mambo a bakimote ba pantanda: kabiji ukapuma pantanda na kamama ka mukanwa kanji, kabiji ne muya wa byatunwa byanji ukatapa bandengamambo.

Baołoka bakamvwala mukwandala mubifuka byabo, kabiji ne bakishika bakamvwala mukwandala wabufumu bwabo.

Kabiji musuka ukekala pamo na mwanamukoko, kabiji kisupa ukala pansi pamo na kana (ka mbuzhi); kabiji mwana ng'ombe ne mwana bokwe ne mwana ng'ombe . . . nagwa mwana ng'ombe, nangwa bokwe

na kana ka ng'ombe; kabiji mwaana wamucheche ukebatangijila.

. . . ng'ombe ne mbeyala bakajila pamo; . . . baana babo ba bacheche (kabiji) bakalajila pamo panshi: kabiji bokwe ukaja sono nobe ng'ombe.

Kabiji mwana lukeke ukakaila pa bwina bwa mulolo, ne mwaana wasumuka ukabika kuboko kwanji pa bwina bwa kipiji.

Abo kechi bakekozhanga ne nangwa konauna mu mutumba wami wazhila ne: mambo ntanda ikayulamo maana . . . nobe meema byo akumbana pa kalunga.

Hum! Amo mo mu Yelusalema Mupya. Ao “mupya” umo. *Musapi*, muno, ubena kutongola, ku Musapi wa kwa Davida. “Aye uji byonse bibiji Musapi ne Kisaka.”

¹³³ Pano, panyuma ya kikye, Musongwa ukamweka. Panyuma ya milungu sebete, Musongwa wamweka mu Lumwekesho kyapitala kyabu 19, na veleshi wabu 1 kabiji ne veleshi wabu 16. Aye wafika na Musongoshi Wanji, Mfumu wabulume. Oo, ami! Amiwa kechi nayuka kana tusakupwisha byonse nangwa ine. Kitambulaitu byonkabyo . . .

Kyawama, twayai tutangetu lubaji lwa kikye, nangwa byonkabyo. Akuno ko kukeya Musongwa, panyuma ya kikye. Mwamona? Panyuma yakufika Myaka kiumbi kimo, nanchi Kilishitu ukabwela na Musongwa. Ibyo, 1 kufika ku 16, kabiji kyapitala kyabu 19.

Kabiji pa kupita bibye bintu . . .

Pakupita ao Malwa akatampe; pakupita Malwa; pakupita Tutetesho; pakupita Myalo; panyuma ya kupanga Satana; panyuma ya kwikala Myaka kiumbi kimo. Monai!

. . . pakupita bibye bintu Naumvwine . . . jiwi ja bantu bavula mwiulu, kasa baamba mba, Aleluya; Lupulukilo, kabiji lukumo, . . . munema, . . . bulume, kwi Nkambo Lesa wetu:

Mambo buchibamambo bwanji bo bwakine ne bwaoloka: mambo wamuzhachisha awa pite mukatampe, waongwelenga pantanda na bwanji bulalelale, kabiji aye washinkanya nanji na mambo a mashi a bakalume banji aji ku maboko anji.

Kabiji jikwabo aye . . . abo . . . Kabiji baambile mba, Aleluya. Ne bwishi bwanji bufutumuka myaka ne myaka.

Akyu kyo kipwilo kya bupite kyakala, “bwishi bwanji bwafutumukile.”

Kabiji ponkapo abo bakulumpe makumi abiji na bana ne aba bomi bana baponene pansi ne kulambila Lesa awa waikala pa jitanda, amba, Amena; Aleluya.

Kabiji jiwi jaishile kufuma mu jitanda, amba, Totai Lesa wetu—Totai Lesa wetu, anweba bakalume banji bonse, kabiji ne anweba mu mwakamwa, bacheche ne bakatampe.

Kabiji Naumvwine nobe jiwi ja jibumba jikatampe, . . .

Telekai! Pano po tuji, Kipwilo. Panyuma Akyo kyaya mwiulu mu kyapitala kyabu 3, papo awe Wiya. Mwamona? Kabiji pano veeleshi wa bu 6.

Kabiji Naumvwine nobe jiwi ja jibumba jikatampe, kabiji nobe jiwi ja meema avula, kabiji nobe jiwi ja kutatauka kukatampe, amba, Aleluya: mambo Lesa wetu Nkambo wabulume bonse waikala ke mfumu.

Aleluya! Monai! Masongola a Mwanamukoko afika. Awe Wiya.

Twayai tusangalale ne kusekela, tumutumbijke aye: mambo masongola a Mwanamukoko afika, ne mukazhi wanji winengezha kala. (Awe Waiya, byonse bibiji, Musongwa ne Musongoshi.)

Kabiji kyamupelwe mba awale kisapi kya linenyi kyalamba, kyatokesha ne kuwama: mambo kisapi kya linenyi byo . . . byubilo byaoloka bya bazhikwa.

Kabiji aye wang'ambijile mba, Unembe mba, Batokwa aba baitwa ku kijilo kya masangola a Mwanamukoko. Kabiji aye wang'ambijile mba, Abo . . . baamba bya kine bya kwa Lesa.

Kabiji Naponene pansi ku maulu anji mba na mupopwele. Kabiji aye wang'ambijile mba, Kileke obewa kwikyuba ne: Amiwa ne mukwenu wa bamwingilo balunda nobe kabiji baji, . . . balongo benu baji . . . balongo benu baji na lushimuno lwa Yesu: bupopwelai Lesa: mambo lushimuno (lwa Kilishitu) lwa kwa Yesu ke mupashi wa bungauzhi.

Kabiji Namwene jiulu jashinkuka, ne . . . mbili utoka, . . . (oo ami!) . . . kabiji newa waikalapo . . . jizhina janji mba Wakishinka ne Wakine, kabiji . . . monka mu bololoke bwanji mo achibila mambo ne kulwila nkondo.

Kabiji meso anji auba nobe lubebe lwa mujilo, ne . . . mutwe wanji pajinga tubondo twavula; . . .

Aye waswanyikilwe buka? "Mfumu wa mfumu."

. . . kabiji wajinga na jizhina ja nembwa, kafwako muntu nangwa umo wijiyuka ne, kanatu . . . ayemwine.

Kabiji wamvajile kivwalo kitoka kyo batupa mu mashi: kabiji janji jajinga mba Aye Kyambo kya Lesa.

“Mu ntendekelo mwajinga Kyambo, ne kyokya Kyambo kyajinga Lesa. Kabiji akyu Kyambo kya alukile ke muntu kabiji waikela muno mwetu.” Ao wajinga Ye ng’anyi? Yesu.

. . . *kabiji jizhina janji jatelwa mba Kyambo kya Lesa.*

Kabiji mazhita ajinga mwiulu amulondejilenga pa bambili batoka, bavwala kisapi kya linenyi, kitoka kabiji kyalamba. (Lukumo! Awe Wiya.)

Kabiji mukanwa kanji mulupuka mpoko yatwa kubiji, amba . . . amba aye epayeko mikoka ya bantu: kabiji . . . ukebalama na kamama ka kyela kya kapotwe: kabiji aye ukanyantaula mu kya kufininamo binyi bya bukaji bwanji bwakatazha bwa Lesa Wabulume bonse.

Kabiji pa kivwalo kyanji ne pa jimbwata panembwa jizhina, MFUMU WA MFUMU, NE NKAMBO YA BANKAMBO.

¹³⁴ Kyajinga kika? Bantu Banji bamuvwiika Aye Mfumu wa mfumu, kabiji Nkambo wa ba nkambo. Kubwela ku Tempo Wanji wazhila, washingwa na Kyeenyi kya Lesa, ne kwikala mu bumfumu bwa Myaka kiumbi kimo na Kipwilo Kyanji. Amen! Akwa kumweka, na Mfumu wa bulume bonse, na kutola kifulo Kyanji ku lubaji Lwanji, Tempo wazhila wabufumu.

¹³⁵ Pano bintu sikisi bya Lumwekesho 6:1 kufika ku Lumwekesho 19:21 byafikizhiwa.

¹³⁶ Telekai pano, mu kupezhako. Atwa Tutetesho Tutanu na tubiji, Matolompita Sebeni, Myalo Sebeni, Malwa Asatu, mwanamukazhi uji ku juba, ubena kupanga diabola, nangwa nsung’unyi uchila, byonse bye byaiya mu kimye kya Malwa akatampe. Kechi mwikelubako ne. Byonse bye bintu byubiwa mu kyonkakyе kimye.

Bino papo paji bintu sikisi bya Kwiya Kwanji. Mwikiketekela nyi? Ke kimye kyawama bingi kubooba bamutemwa Nkambo! Na kubuula, mulunda, kechi twakonsha kutupila kyokyo ne. Kutupila kyokyo ne, pa byonse byo muuba. Ikalai bashininwa!

¹³⁷ Pano, Pamulungu ubena kwiya, inge Nkambo waswa, Nakeba kuleta, inge wakonsha nkukwashaa, kumwesha paji oa moba sebeni, kimye kyo byaubiwe, na kuleta aye yonka—aye yonka yo Naji kuuba leelo, kabiji ne kubika aby a bimye biye sebeni, milungu sebeni, milungu sebeni iji mu yewa kalenda waki Yudeya, kabiji ne kumwesha kine kimye kyo tubena kwikelamo kuno ku mpelo, inge Nkambo waswa.

¹³⁸ Bushe mwamutemwa Aye nyi? [Kipwilo kyaamba mba, “Amena.”—Waku.] Bushe mwakonsha kushalapo Mwiulu nyi? [“Ine.”] Tuji mu kimye kya kumpelo!

Ubena kwiya na kuuba ka? Kintu kitanshi kikobiwa, Yesu kasa akyangye kwiya pantanda ne, kika kikekala kintu kitanshi? Akyo Kipwilo ki kooba (kika?) lapicha! Bushe Yesu ukeya pantanda ne kwendauka wazhokoloka ku bilende, kabiji ne kwaimuna maboko ne bamaama ne bataata, ne kwamba kwi atweba bonse kuno, ne kuya mwiulu nyi? Ine!

Kikekala byepi? Aye...Twaamba mba bibye kwi anweba, konka ku-ku Kyambo kya Nkambo, "Atweba tukashala bomi..." Tesalonika Wabubiji, kyapitala kyabu 5, "Atweba tukatanwa bomi pa Kwiya kwa Nkambo, kechi tukatangilapo ne kusha boba balala mutulo ne. Mambo ntolopita ya kwa Lesa ikavuma; ne bafu ba mwi Kilishitu bakasanguka patanshi: kabiji atweba tukatanwa bomi tukashikulwa pamo nabo ne kukumanya Nkambo mulwelele." Atweba tukalulwa mu kakimye kacheche, nobe kukopa kwa jiso. Mu kyokya kimye, kya kupwa Nkulo ya Kipwilo.

¹³⁹ Nanchi, papo pansi patanda Lesa ukatatula kwingila na ba Yudeya. Kukekala bangauzhi babiji. Kyapitala kyabu 11, tusakutola kyokyo. Bangauzhi babiji bashingwa, nobe Elaija ne Mosesa, Naketekela mba byo kiji. Kabiji bakeleta mafingo akatampe, panyuma yakumona mba bintu byonse byaikajikwa bulongo, kabiji Loma wachibile lulayang'ano lwanji, awa mfumu.

Pakachi ka mulungu wabu sebete, ukachibakanya lulayang'ano ne Loma, nangwa Loma ukelwabanya na Isalela, kabiji akya kikalengela kutatula kyabunya kileta kupalang'enamo. Kabiji kukekala muyulo mukatampe, kimye bashalapo mu Ngentila, kisungu walala tulo... Awa nsung'uni, Loma, wampajile meema kufuma mukanwa kanji, mu kulwisha bashalapo ba mu lukunwa wa mwanamukazhi balama mikambizho ya Lesa. Loma ukooba kyokyo.

¹⁴⁰ Kije kya bipwilo kikebaleta pamo, nen kuletamo ba Yudeya mu kyokya kije, kabiji ne kwibabwezha ku bupopweshi bwa ku tempo jibiji, mu ABYO BYOBYAAMBA AYE NKAMBO kufuma mu Baibolo, kabiji bakekala na kipwilo kyabo bene.

¹⁴¹ Pakino kimye bobang'anyi? Najikupitapotu katataka. Kikiji kipy. Pakino kimye ke kyaalo, baitabizhiwa ne kubyaalo. Abyo ibyo nyi? Bino kechi banji na bupopweshi bwabo bwa ki tempo ne. Kabiji batatula bupopweshib bwa kin tempo, Kipwilo nishi kyaya. Lesa ukengilanga na Bayudeya nobe kyaalo. Kabiji umvwe baletwa mu kikye kije, Loma ukachibakanya pakachi ka mulungu wabu sebeni, myaka isatu naafu, aye ukachibakanya alwa lulayang'ano nabo, kabiji ne kulengela kya bunya kileta lonaike kukumbana poso ne kupelo. Apo ipo po akatola bonse babiji ba Polotesitati, ne Bayudeya, na kwibamanyika. Mu kyokya kimye, aba bangauzhi babiji bakemana kabiji ne kufinga ntanda, amba kechi inoke mvula mu moba abo ne. Kabiji

baketa Mujilo kufuma Mwiulu, kabiji ne bintu bikwabo. Anweba pembelelaitu. Tuji na byavula biji papo, batujilwa atweba, byakufunda.

¹⁴² Oo, ke Lesa mukatampe bingi byo Aji! Ke Taata wa lusa! Balunda, lekai ng'ambe kikye, nobe kafunga wenu. Anweba kechi mwayuka mashuko o mubena kwikalamo ne. Anweba kechi mwayuka ne. Kuji bantu bakatampe bingi, kuji bazhijikwa bavula bingi, kuji masauzande aba bantu bazhila bafwile myaka yapita kunyuma, Bantu bayulwamo-na mupashi abo bafwaijilwe kutemwa kwikala mujino juba jo mubena kwikalamo. Lekai anweba ne Amiwa tusende jije jishuko.

¹⁴³ Kika kikwabo kyo twafwainwa kutalapo? Kika kyo twafwainwa kuuba pa kupita kikye? Kwepi ko tubena kuya? Kika kikamweka? Twafwainwa kuya kuntu kumo. Anweba kechi mwafwainwa kwikala kuno kimye kyonse ne. Mwakonsha kukupa sono yenu; mulungu walondelapo ikakebewanga kukupa jibiji; ee, jabubiji, akya kimye kasa kikyangye kufikila ne. Mwakonsha kukomesha baana benu. Anweba mwababajisha kajo ka mulajilo; inge papita kimye ke zala jibiji. Mwibapa kajo ka mulajilo; bafwa zala jibiji lukeelo kelo. Mwibapotela sapato; inge iji nobe yami, pepi nobe babiji nangwa basatu bang'ondo mwibapotela ikwabo. Mwibapotela byakuvwala uno ng'ondo; ng'ondo umo nangwa babiji mwibapotela byakuvwala byakatataka. Mwamona? Kafwako nangwa kimo kya kutwajijila ne. Kafwako nangwa kimo kyaikajikwa ne. Kafwako nangwa kimo kyakonsha kwimana ne.

Kechi mwikale na bunoshi bwa pantanda
bubola ne,
Bubola bukiji bukiji,
Bikai luketekelo lwenu mu bintu bya Peenape,
Abyo kechi bikapita ne!

Binye mwayula bintu bipipulwa bingi lubilo,
Kafwapo nangwa kimo kyakonsha kwimana
ne,

Shimikai luketekelo lwenu pa bintu bya
Peenape,
Kwachijilai ku kuboko kwa Lesa kubula
kwaluka!

Kwachijilai ku kuboko kwa Lesa kubula
kwaluka!

Kwachijilai ku kuboko kwa Lesa kubula
kwaluka!

Shimikai lwitabilo lwenu pa bintu bya
Peenape,

Kwachijilai ku kuboko kwa Lesa kubula
kwaluka!

Telekai:

Kimye lweendo lwetu byo lukapwa, (Aye uketuyukisha umvwe lwapwa.)

Inge kwi Lesa twaikala bakishika,
Wawama ne kutoka muzhi wetu wa Lukumo,
(Awa Muzhi washingwa.)

Mweo wetu wapipulwa ukekimona!

Kwachijilai ku kuboko kwa Lesa kubula
kwaluka!

Kwachijilai ku kuboko kwa Lesa kubula
kwaluka!

Shimikai luketekelo lwenu pa bintu bya
peenape,

Kwachijilai ku kuboko kwa Lesa kubula
kwaluka!

Kechi mwikalale na bunoshi bwa pantanda
bubola ne,

Bubola bukiji bukiji,

Shimikaitu luketekelo lwenu pa bintu bya
Peenape,

Abyo kechi bakapita ne!

Kwachijilai ku kuboko kwa Lesa kubula
kwaluka!

Kwachijilai ku kuboko kwa Lesa kubula
kwaluka!

Shimikai luketekelo lwenu pa bintu bya
Peenape,

Kwachijilai ku kuboko kwa Lesa kubula
kwaluka!

Byo tubena kukunyika mitwe yetu, inge kechi mwakitolala
kuboko Kwanji ne, kechi mwakonsha kwiya na kwikyuba pa
okino kimye nenyi?

Kwachijilai ku kuboko kwa Lesa kubula
kwaluka!

Shimikai luketekelo lwenu pa bintu bya
Peenape,

Kwachijilai ku kuboko kwa Lesa kubula
kwaluka!

¹⁴⁴ Nsongwakazhi mucheche, wi walamba, ukyangye kusongolwa. Suki yobe icheche yalamba bingi, mabuta obe ancheche alamba. Pakuuba, wayukatu, kikekalatu ja keesha, poso, buuya bukatatula kupwa. Twakonsha kuyuka byepi mba mulungu ubena kwiya bilongolo kechi bikajananga ne, mu mushiji, ao alamba,acheche, mabuta amaluba?

¹⁴⁵ Mulongo mwanyike, ukiji wakosa, wabaya, wakosa misunyi; uji na byavula byo waketekela kuuba. Pakuuba pa kupita kimye kicheche, keeshatu, ayo yalamba, suki izhinga ikabenamo, kabiji yo ukashala nayo ikalukatu ke mvwi. Abyo byabaya, bipuzhi

byaoloka, ne bilongolo bikatatula kuja mikoko ne misunyi. Abo bakemusenda, mu lukungu.

Nanchi, shimikai luketekelo lwenu pa bintu
bya Peenape,
Abyo kechi bakapita ne!

Kwachijilai ku kuboko kwa Lesa kubula
kwaluka!
Kwachijilai kwa Lesa...

Nasaka namba obewa urike utambule kuboko Kwanji pa
kino kimye.

Shimikai luketekelo lwenu pa bintu bya
Peenape,
Kwachijilai ku kuboko kwa Lesa kubula
kwaluka!

Nanchi inge lwendo lwapwijiika, (Byo
kikekala, juba jimo.)
Inge kwi Lesa waikala wakishika,
Wawama ne kutoka muzhi obe Mulukumo,
Mweo wetu wapipulwa ukekimona!

Kika kyakubula ku kwachijila ku kuboko kwa
Lesa kubula kwaluka!
Kwachijilai ku kuboko kwa Lesa kubula
kwaluka!
Shimikai luketekelo lwenu pa bintu bya
Peenape,
Kwachijilai ku kuboko kwa Lesa kubula
kwaluka!

¹⁴⁶ Bintu byavula byo Namona, pepi nobe myaka satewanu kunyuma ya desika. Namonapo mafuku amo aleta bulanda; Namonapo bimye byawama bingi. Kimye kya bulanda bwabaisha bo Nakimonapo kala mu bumi bwami... Nobe byonka byo nakimonapo baana babula kajo mu mukwakwa; Namonapo basemi kulomba ka kibese kamo ka shinkwa. Bufuku bo Nakimonapo kala, ke kumona mwanamulume, muntu umo, ao wafwainwa kwikala mwaana wakwa Lesa, kufwa kwakubula kuyuka Lesa.

¹⁴⁷ Navuluka mwanamukazhi waimene pa kibelo bufuku bumo, bwa kino kipwilo, wansekele ami. Kabiji waambile mba, "Amiwa kechi nakonsha kuleka ng'ombe wami kwikala na bupopweshi bwamusango yewa ne!" Kwakubula ne kukumanya awala umo ne, Naichilwe kuya ku kipatela. Mwanamukazhi walamba, pepi nobe myaka tweti-tuu, wajinga na kubijika, "Imanatu awa musapwishi!" Wajinga waku Katolika, konka kulwitabilo.

Byo Nayileko, nyenga mukote waambile mba, “Obewa wakelwa bingi, Mulongo Branham. Aye po awfila pa pepita ne mamineti faivi.”

Naambile mba, “Bushe Nakonsha kumumona nyi?”

Waambile mba, “Aye wajikubijika na kukukeba obewa, mu byambo byanji byakupelako, ‘Letai yewa musapwishi, Mulongo Branham!’”

Mulume wanji wajinga poka, kasa abijika mba, “Mulombeleleko! Mulombeleleko!”

Naambile mba, “Kimye kyapwa bingi pakino kimye.”

¹⁴⁸ Nandosejile kipembe pansi. Wajinga na meso akatampe achiluluka abaya. Mwanamukazhi walamba; mikanyi icheche pa kilungi kyanji; suki yawama; utalwa bulongo bingi. Wamanamine bingi poso mikanyi yaimana mu kilungi kyanji nobe tibilonda. Meso anji atununukile kufuma mu mujiso, byobya. Kabiji, mambo, mila yanji ne mafyo byajinga na lukatazho, akyo kiji mu—mu...Bavula byo booba kimye kya kufwa, javula. Kabiji byo ajinga, walala mu yewa musango, mukanwa mwanji mwaasama. Kabiji bikope byanji papo, byanvwetele lubaji lumo lwa jiso janji. Amiwa kechi nkekilubako ne. Lwimbo wayishile mu milanguluko yami.

Kechi mwikale na bunoshi bwa pantanda
bubola ne. (Kulamba, kwitota.)

¹⁴⁹ Naimene ku lubaji lwa mwanamulume ku Port Fulton, wafwilenga. Bangichile ku lubaji lwa mwanya wanji. Kabiji Namulombejile kuno ku kitapisho kimye kimo bufuku. Aye wabikile kuboko kwanji ku kumbata mwanamukazhi. Naambile mba, “Mfumya kuboko nkobe ku yeo inetu.”

Aye waambile mba, “Mbena kumutangijila kwi Lesa.”

¹⁵⁰ Naambile mba, “Kechi kuboko kobe kumukumbata ne.” Amiwa kechi naketekela mu byobyo bintu ne. Aye wanzhingijile. Waimbile kizhilo.

Naille kwi aye, palutwe pacheche, kimye kyo awwilenga. Aye watajile mu kilungi, waambile mba, “Kechi undombelele ne, Mulongo Bill. Amiwa na lubilamo. Amiwa naya.” Waambile mba, “Byonse byo Nanonkele, byaya.”

¹⁵¹ Naimene ponkapa pa koona, musiso mucheche kufuma muno, juba jimo, ku mwanamulume wangichile ku lubaji lwanji kimye kyo awwilenga. Aye waambile mba, “Amiwa kimye kyonse nkeba *kikananga-ne-kikananga*, kabiji ne bikwabotu byabyobyo.” Aye waambile mba, “Bino Amiwa kechi na ingijilengapo Nkambo ne. Bimye byavula Nakakalwanga kuya ku kitapisho.” Aye waambile mba, “Mulongo Branham, ndombeshepo mba Lesa aleke awa nsongwakazhi mucheche akekale ke mfuto ya bintu byo Naubile. Kapepo wakonsha kubilapo Nkambo kintu kimo.”

¹⁵² Naambile mba, "Akyo kechi kyakonsha kubiwa ne, mulongo. Bintu byo wafwayijilwe kuuba bya onaika." Hum!

¹⁵³ Naimene ku lubaji lwa mwanamulume, na mumwene kulwa na badiabola mawala tweti—foolo. Waambile mba diabola waimana ku lubaji lwa mwanya na minyololo yapombwa mushingo yanji. Waambile mba, "Kuswisha mba basende ne!" Ubena kubijika; kasa akwachijila ku mwanya. Waambile mba, "Awa waimana. Kechi mwikimona nenyi? Kibena kundondela." Wamutujilepo Lesa, kimye kyabaya kyapichilepo. Wajinga na bipaka byayula munyevu, byayula wichi, bambili bawama ba kwikyombesha. Mwaka wajingako kunyuma, wa mufingile Lesa mu kilungi Kyanji, waimbile mukazhaji lupi mambo akuya ku tabbanako. Mwayukatu kyamwekele nyi? Kalumba kafikijile pa kipaka kyanji, ne kwipaya bambili banji, kasoka munyevu wanji. Kabiiji awa mwanamulume wafwile na mambo akyuya.

¹⁵⁴ Kabiji mulunda nami wakala (lukumo!) waimene byobya, wafikile ku mpelo ya lwendo. Naambile mba, "Anweba mubena kuya, bataata?"

Waambile mba, "Akye ikyo, Billy."

Naambile mba, "Muji byepi?"

¹⁵⁵ Aye waambile mba, "Kijitu bulongo." Waambile mba, "Letai baana bami kulubaji lwa mwanya." Aye wabikile maboko anji akokelela pa baana banji bonse ne kwibapesha. Wabujile bana banji babalume, amba, "Sutulaiko maboko enu, nobe byaubile Yoshiwa ne Kaleba." Twakuminye bingi mambo kechi twayukile kyo akebelenga kwamba ne. Aye waambile mba:

Juba jawama, juba jawama,
Kufuma kimye Yesu kyo angomvwele bubi
bwami!
Aye wafunjishe kukeketa ne kulomba,
Kabiji ne kwikala na lusekelo pajuba pajuba.

Tuji na bintu bimo bya byobyo bya kwiyako, balunda! Kafwako nangwa umo ne kana bonka bakabila kuja kajo kawama, kwendesha motoka wawama, kwikala na byakila kuwama. Amiwa kechi mbena kumuzhachisha ne. Akyo kijitu bulongo. Lesa ukeba mba obewa wikale nakyo, bino:

Kechi mwikale na bunoshi bwa pantanda
bubola ne,
Bubola bukiji bukiji,
Shimikai luketekelo lwenu pa bintu bya
Peenape,
Abyo kechi bikapite ne!

Twayai tusutule maboko etu pano kimye kyo tubena kwimba.

Kwachijilai ku kuboko kwa Lesa kubula
kwaluka!
Kwachijilai ku kuboko kwa Lesa kubula
kwaluka!
Shimikai luketekelo lwenu pa bintu bya
Peenape,
Kwachijilai ku kuboko kwa Lesa kubula
kwaluka!

¹⁵⁶ Kimye kyo twakimana, twayai twaluluke ne kwiimuna shikoma na muntu umo pano. Atweba tusa kutwijijilatu, na mpwijiilo, pa kakimye kachechetu. Bino Nasaka namba anweba muzhinguluke pa kimye kyo tubena kwimba veeleshi mukwabo wa iye lwimbo.

Kwachijilai ku kuboko kwa Lesa kubula
kwaluka!

Kyubai, taata! Kyubai, taata! Kwi Lesa! Kyubai, mulongo!
Kyubai, mulongo! Kyubai, mulongo!

Shimikai luketekelo lwenu pa bintu bya
Peenape,
Kwachijilai ku kuboko kwa Lesa kubula
kwaluka!

¹⁵⁷ Bushe kechi mujipo nalusekelo pa Aye nenyi? Ambai mba “Amena!” [Kipwiло kyaamba mba, “Amena!”—Waku.] Bonse bo namutemwa Aye, ambai mba, “Jitotwe ja Nkambo.” “[Jitotwe ja Nkambo!]” Bonse baketekela mba babena kuya kuyewa Muzhi wa mbaji ina ya esakana. (Kwachishai, pa mineti umotu, na lwimbo wenu.)

Amiwa mben a kuya ku yewa Muzhi wawama,
(Pano uya byepi?)
Nkambo mwaneengezhezha jimo Banji Mwine;
Kobaikala bakulwa ba mu makulo onse
Imbai “Lukumo!” nakuzhokoloka ku Jitanda
Jitoka;
Kimye kimo Ng’umvwa kitendwe kya Mwiulu,
Kabiji alwa lukumo Amiwa ke lumona:
Kukekala lusekelo lwabayen bingi, byo
Nkamona Mupulushi wami,
Mu yewa Muzhi wawama wa golonde.

Mwikitemwa kyo nyi?

Amiwa mben a kuya ku Muzhi wawama,
Nkambo Wami mwaneengezhezha jimo Banji
Mwine;
Kobaikala bonse bankulwa ba mu mankulo
onse

Imbai “Lukumo” na kuzhokoloka ku Jitanda
 Jitoka;
 Oo, kimye kimo ng’umvwa kitendwe kya
 Mwiulu,
 Kabiji lusekelo Amiwa nkelumona:
 Nkekala na lusekelo lwabaya bingi, byo
 Nkamona Mupulushi wami,
 Mu yewa Muzhi wawama wa golonde.

Mwamutemwa Aye nyi? [Kipwilo kyaamba mba, “Amena.”—
 Waku.] Nanchi:

Yanga Najo ja kwa Yesu,
 Mwaana wabulanda ne wamalwa;
 Jikakupa lusekelo ne lutekenesho,
 Yanga Najo konse konse.

Jizhina Jawama, (Jizhina Jawama!) Byo
 janemesha! (Byo jawamisha!)
 Luketekelo lwa ntanda ne lusekelo lwa
 Mwiulu;

Jizhina Jawama, (Jizhina Jawama!) Byo
 jawamisha!
 Luketekelo lwa ntanda ne lusekelo lwa
 Mwiulu.

Pano, kechi mulubeko Pamulungu lukeelo ne, naini-sate.
 Nanchi tukeseka, inge waswa, twapwisha bukiji, kwikala na
 milombelo ya bakolwa, Mulungu ubena kwiya lukeelo pa
 naini-sate.

Pa Jizhina ja Yesu nakufukama,
 Kupona kikuvumene ku maulu Anji,
 Mfumu wa bamfumu Mwiulu tukamuvwika,
 Kimye lweendo lwetu byo lukapwa.

Jizhina Jawama, (Jizhina Jawama!) Byo
 janemesha! (Byo jawamisha!)
 Luketekelo lwa ntanda ne lusekelo lwa
 Mwiulu;
 Jizhina Jawama, (Jizhina Jawama!) Byo
 jawamisha!
 Luketekelo lwa ntanda ne lusekelo lwa
 Mwiulu.

Telekaitu pa yuwe veeleshi:

Pa Jizhina ja Yesu nakufukama,
 Jojikebo jobe;
 Inge meseko,
 Lomba Wijitele Wijitele jazhila. (Byokiji!)

Jizhina Jawama, (Jizhina Jawama!) Byo
janemesha! (Byo jawamisha!)
Luketekelo lwa ntanda ne lusekelo lwa
Mwiulu;
Jizhina Jawama, (Jizhina Jawama) Byo
jawamisha!
Luketekelo lwa ntanda ne lusekelo lwa
Mwiulu.

Pano Napana kupwila ku bakafunga, Mulongo Neville,
ambepo byambo byanji bya kupezhako ne bikwabotu byo
akonsha kwamba.



*BINTU BITANU NA KIMO BYA LUPEPU
LWAKWA NGABALIELA KWI DANYELA KDE61-0730E*
(The Sixfold Purpose Of Gabriel's Visit To Daniel)

LUFUNJISHO LWA LONDAKANA LWA MILUNGU MAKUMI ATANU NA IBILI YAKWA DANYELA

Ino Mbila na Mulongo William Marrion Branham, yalupwilwe patanshi mu Kizungu pa Mulungu mabaanga abufuku, 30 Makumbikumbi, 1961, ku Branham Tabernacle ku Jeffersonville, Indiana, U.S.A., byafumishiwa pa tepu ukwata ne kufyatula kabiji bya nembwya mu Kizungu kwa kubulwa kupimpulwa. Ino ntuntulwilo muki Kaonde ya nembelwe ne kusampanya na ba Voice Of God Recordings.

KAONDE

©2023 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.

www.branham.org

Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org